

兩浙輶軒續錄

兩浙輶軒續錄卷二十五目

潘恭常 屠倬 鄭城 費丙章 錢林

陳傳經 查元僈 吳乙照 錢儀吉 吳增嘉

竺之侃 張作楠 馬基 唐鳳儀 李若虛

姚燠伯 金楹 姚承憲 姚鎮 黃東野

錢泰吉 范玉琨 錢梅 馬仲甫 吳蘭森

屈爲章 高銓 張應鼎 陳恩翔 陳曙

李聯奎 黃源屋 張景山 方應麟 張萬傑

蔡敷 湯春 孫同元 李紹城 沈之璵

陳履亨 陸坊 徐保字 章超文 何美濬

汪能肅 周辰謨 李師泌 陳鴻達 陸雲樞

邢照 劉佳 朱晉 曾煜 方成珪

蔣 澧 陳 鶴 陸費瓌 項朝棻 黃延禔

汪 琳 沈學善 卜爾昌 金 槃 張在茲

姜 同 杭端仁 周恩兼 蔣 楷 胡 玉

王啟曾 汪繼熊 馬詒孫 林壽椿 錢仁榮

董慶槐 沈琛晉 徐傳經 陳夢蘭 葉 煒

陸文傑 余國琛 張 炯 張 颿 方國泰

李士詔 吳祖棠

兩浙輜軒續錄卷二十五

督學使者潘衍桐訂

潘恭常

字彰有號吾亭錢塘人嘉慶戊辰進士官江蘇蘇州府學問

杭郡詩三輯吾亭學問淵富與紅茶方伯有二難之目通籍後由水部郎考授湖廣道御史出巡滬上政聲治績與龔開齋觀察後先輝映也

琴鳴同年招集湖舫余將之袁江不果往用紅茶弟所

分韻奉柬

我昔賞雨西湖偏朋尊每趁清秋前窪深一尺泥沒踝解屨  
各就茅菴然湖風吹黑嶺雲溼猛雨迸落如奔泉天公故欲  
發奇弄使湖跳浪山飛烟坐令此景不可再往往追憶神魂  
顛今年春寒寒特峭陰雨半月猶連縣琴尊不耐花事寂聽  
雨有約來羣賢我時薄游公路浦急裝明發未可延想見諸  
公鬪豪健冒雨同上湖濬船澹妝濃抹比西子此語昔者聞

蘇髯不知此樂樂何似亦有風景如當年鷗盟已合今舊雨  
蠟屐況結湖山緣屠郎健吟復善畫杏花春雨為我寫入丹

青邊

屠

倬字孟昭號琴隲又號潛園錢塘人嘉慶戊辰進士官浙江西袁州知府著是程堂集

阮元序畧余于浙西見文華三人

日陳雲伯曰查伯葵曰屠孟昭

吳錫麒序畧孟昭夙智早成質行獨絕經緯人事

之言習知其英變惻隱古詩之義敦悅其芬芳

法式善序畧郭頻伽詩清雄查梅史詩瑰

麗琴塢年減于二君所為詩則弗減也

馬履泰序畧昔見孟昭于京師知其能詩然彼方銳意

于畫標囊細軸淪茗欣賞後出宰真州閱其詩卷多蕭

疏澹遠之趣非其

胸襟之高曠歟

郭騰序畧孟昭故越人而居于杭詩才

氣伉爽有幽并烈士河朔少年之風

查初揆序畧僕于孟昭十年以長第畜灌夫

一坐之中心驚王粲儒兼乎俠文如其人

出塞篇贈蒲快亭進士

君不見曹景宗笳鼓聲中拈競病獨騎快馬如追風高歌擊  
鐙氣豪逸坐令沈約難爲工丈夫慷慨負奇骨那得不如廝  
養卒讀書擊劍吾未成眼看蒲髯亦豪傑昔年詞賦誇長楊  
親藩亦愛狂生狂藁筆鄒枚成上客講學沛獻皆賢王  
聖朝不奏軍中樂萬里雄邊盡甌脫要將雅製頌

昇平木蘭先進迎

鑿曲龍旂畫卷風沙黃短後忽改書生裝洪流卻渡白河澗  
一綫直摩青石梁金錢結口五花勒整轡調鞍眞儻個雙鞵  
壓臂掣阜雕翻身箭入秋雲高圍場立馬色不動十萬羽林  
亦神聳掀髯一笑弓擲地筆硯前呼健兒捧秋山木落風雲  
開千騎萬騎關門回搖鞭兀兀唱銅斗公卿都說蒲髯來

題王石谷畫

我初學畫學檀園頗將筆墨破籬藩誠齋詩格正相似自謂  
當在二子閒中間學詩學蘇韓畫法一變求董源董源筆力  
遠難到亦如詩學蘇韓難華亭尙書具魄力平心靜氣學始  
得于唐白傅宋放翁自有性情驅筆墨詩源未可割唐宋畫  
派終須合南北虞山王翬其庶幾杜法且傳黃魯直

牛車謠

水流汨汨沙有聲牯牛駕車沙上行潮頭拍岸齧沙腹牛肥  
車重折車軸江心帆飽呼順風販夫踏浪水沒胸牛車獨輪  
行不速船頭白浪高如屋

高枕

高枕滄江上官齋未是家風林梳積葉霜菊慰孤花歸鳥宵  
來警塵襟宦後賒壯心驚櫂馬城上起悲笳

聖果寺

秋氣一山老亂山搖夕陽江雲到門黑沙磧抱城黃霸業銷  
吳越琳宮壓鳳凰舊時歌舞地一半臥牛羊

送兼山還虞山

風塵刺促上離筵滿耳秦聲話九邊金盡不妨仍結客時清  
未可說歸田無多同調偏嗟別便約看花已隔年更憶琵琶  
查八十蹇驢歸去又江天

文丞相祠

清邊堂內疑秦謀幕府山前泣楚囚猶有孤城能死守不知  
滄海已橫流寒潮瓜步眞遺恨曉日扶桑與訴愁媿煞絃歌  
將父老心香一瓣望神游

節孝詩爲鄭書常徵君母孺人張節母作



雙黃鵠飛飛不相離悲鳴常苦辛  
苦辛一何極中道失故羣  
滄浪之天胡不聞妾不有夫  
何有身奈爾呱呱兒生未浹旬  
兒勿呱呱兒命苦上高堂我不  
欲泣對之淚如雨舅姑謂婦  
且勿悲爾夫之言勿可違行當  
覆翼孤兒覆翼孤兒婦自知  
之婦爲舅姑無不爲他日兒當  
知之吁嗟乎兒生不見父兒  
長母復不見兒兒方望母留斯  
須號呼向天母不知手中捧  
檄中心悲西山蒼蒼女貞木  
夜夜烏嚙似兒哭

題頻迦靈芬館圖四首時方移居魏塘

墊巾爭議郭林宗卻走天涯似  
轉蓬聞說年來倦行役全家  
移住鶴湖東

本來家具少於車不爲移居賦卜  
居尙有隨身竿木在爲君

添寫入神廬

頻迦先有神廬圖竿木庵則  
近來錢塘所署行館名也

阻風中酒過年年纔得空山縛一椽眼底青山篋中畫不從  
人乞買山錢

蓬頭尙無王霸子赤腳惟有玉川奴雪中歸去閉門臥憐爾  
如今成老夫

謝薊泉侍御李墨莊兵部伊墨卿太守張船山檢討楊  
蓉裳戶部程春廬兵部陳碩士編修潘紅茶編修蔡  
浣霞禮部招集江亭二十韻

孤亭四無倚躡級披草莽煙條壓寒柳綠意春漸長郊圻尙  
淒冷幽討空悵惘羣公競作主趣騎招我往春游晴固佳得  
雨亦可賞沙軟野水平卻作江南想春陰方過半花氣雨中  
養似苦北地寒幽禽翬圓吭天涯此羈旅塵事初息鞅出門  
排日醉我胡不自廣況茲城南西高原拓平敞馬曹閒拄笏

山色落平掌酒酣衣袂舉似御冷風上脫帽寬禮數快論極

洪漉瀛洲老學士出語秋競爽

是日梧門學士詩先成

心意雖老太古

調難繼響憐余觸四塵身似腰鼓顙但借酒力嚴爬搔祛垢

癢韶光未云晚挈榼再來儻有意與春競忽笑退之罔

往者張君

孟滄

贈詩有我昔聞君名毀譽各參半之語

有慨於中不遑酬答嗣以蒼茫獨立詩畫冊見索題

句眇邈泓窈逃情刺虛可以見君志矣聊抒己懷以

當贈處

宙合不可窮乃思駕尻與身世未有涯胡能守空株行坐或

起立誌誌復吁吁寄情在軋沕是亦非真吾余生既無似不

慧亦不愚頗亦念大道未可終蛻虛有時據槁梧自覺形神

孤回颿肆碭駭心志牽煩挈古今幾朝暮天地空濛廬茫昧

不可究如摘埴索涂念彼造物者位置良區區或上御史驄  
或乘少游車或題趙岐碣或棄令昇觚或從李嶠請讀盡中  
祕書不然但拍張封侯亦良圖人生笑鹵莽日已心計蠲神  
明寄空竅違才託荒餘從來相奇士未當別屠沽是身爲夢  
宅封情安能據往與吾子交逸若鳳脫箴自顧雖蹇劣不制  
如草駒振奇亦何益穢跡仍自汙猶猶與鼎鼎微尙不可誣  
吁嗟觸世網智術交相驅先機動眉睫給口掉舌樞嗜欲涇  
渭雜衣冠纍囚拘子子顛倒閒坐令歲月徂何如攝神智鎔  
入大冶鑪俯仰入絃隘出入元化俱顧此平生懷未免眾所  
迂亮哉吾子心堅白乃不渝怛中結紆軫放曠從歌呼彌望  
儻莽閒吾其渺江湖

洪忠宣公祠堂古柏圖介亭前輩屬題

我展古柏圖再拜尙書洪見圖如見柏見柏如見公苦心不  
使螻蟻蝕粟麩桃梨亦臣職絮書萬里達君前慟哭兩宮歸  
不得此身如柏貞且堅可憐白髮羈窮邊冷山風雪十五載  
鄱陽祠宇七百年霜皮剝裂膏流渾大廈將傾失梁棟遷移  
竟死佞臣讒忠義徒教敵人重吾鄉亦有公神祠懷題照耀  
西湖涓地近鄂王墳上樹風雷親見檜分屍

張烈婦詩

并序

甯化張朝鐸妻曰賴氏嫁六年而夫病詢之日者曰  
夫必死婦必再適無何朝鐸竟死婦恚日者言誓不  
再適雉經以殉伊太守秉綬吳徵士賢湘爲書其事  
可傳信已烈婦弟春來乞言詩以哀之

夫可生妾敢死日者言竟不起夫不生殉則已日者言亦窮

矣妾有夫妾無子夫不生妾何恃日者言有如彼再適人妾之恥朱絲繩長尺咫妾命畢亦天只命可奪操諸已數之窮不有理婦姓賴歸張氏吁烈哉光彤史

張孝女詩

并書事

孝女姓張氏名巧姑儀徵人父曰天相病瘵不能起立兩兄備他所孝女獨與父居乾隆甲子正月十八夜比鄰不戒于火火延及門孝女狂號負父出及門而仆與父俱死年十有四明日出其屍灰燼中猶肩承父屍握父手弗釋邑人建石幢書孝女死父狀誌其處嘉慶三年戊午縣丞申君淑泮濬渠得故所立石幢土壤中大驚則與邑令申其事于督撫以聞于

朝始得

旌典于是邑人爲立祠三楹于其所居新柏街奉粟主焉

又十二年庚午傳適來宰斯邑過孝女之祠而拜焉

且感申君之知義也旣而戚然念孝女死之日去濬

渠得石請

旌之歲才五十四年耳而事已不傳于父老石且仆土壤

中今雖祠易朽土木之不堅于石可知也脫再數十

年且廢誰爲申君者念惟文字可以傳久與金石比

然攷建祠時兩淮都轉運使今貴州巡撫曾公嘗書

文與詩表之載公集中今讀前令顏君續撰邑志書

孝女事僅數言耳已不載曾公文嗚呼此傳之所以

戚然增感也昔漢上虞曹娥入水求父屍而死年亦

十四至今祠祀江上近二千年不廢後世曹娥比者

或不乏而曹娥之名獨著且重豈不以邯鄲滄之文  
有以傳之又得蔡中郎之題益重其文而傳之耶夫  
時有遠近忠孝天性無古今千載上有曹娥千載下  
有張孝女其事相類而吾獨悲夫孝女之石數十年  
而已仆父老不能傳也傳不文不足以傳孝女故僅  
書其事不敢爲碑辭願亟書其事而反復致意于傳  
不傳云爾者冀當世文章之士感余言必有能爲邯  
鄲滄蔡邕者以與曾公之文竝傳孝女于千載也雖  
然孝女之死旣得

旌矣卽不以文辭傳吾知孝女之目已瞑固無媿于曹娥  
而吾之汲汲思有以傳之者欲天下後世之人聞孝  
女之風而興起知忠孝天性古今人無不相及雖委



巷童穉之女遂爲曹娥不難也既書其事復爲之歌

新柏街孝女死乾隆初歲甲子嘻嘻出出夜半呼頑風不返

孝女廬孝女者誰張巧姑父痹不能行排闥奪門負以趨屋

山傾頽震霹靂風自火出煙四塞孝女力弱行不得肩承阿

父與俱踣燎原勢方張烈焰照八荒彤幢絳帷赤冠裳炎官

雷公駿趨躡赤蚪吐舌如虹長火馬辟易走且僵嗚呼我孝

女曷不披髮血面訴彼蒼孝女感我言上論天帝側祝融之

神帝所敕胡肆其虐罪應斥帝聞孝女言太息孝女賢汝冤

不可雪褫神之魄爲汝湔孝女感激涕泗漣帝命錫孝女天

門鼓闐闐霓旌而霞車導我孝女前孝女還入門焦髮頰目

暖抱持父屍招父魂魄兮歸來說煩冤里神社鬼左右奔護

孝女屍骨尙溫至今新柏街人稱孝女里里人爲築祠春秋

有專祀嗚呼孝女之孝古誰比孝女十四死于火曹娥十四死于水

鄭

城

字維宗一字念橋號晚晴錢塘人嘉慶戊辰進士官直隸肥縣知縣

吳振械傳略念橋少孤其舅氏吳稼軒教育之嘗從黃相國文學詩下筆即工雋既罷官不得歸主講廣平之清漳書院者八年郡人皆知從事於聲韻之學卒于講舍

山夜

日落山翠重雲霞態屢易幽尋惜素心清賞永今夕度壑想  
潛鱗投林識倦翻砌芳暗襲袂嶺月出窺客秋期渺河漢露  
氣滋竹柏野曠時早寒夜明山更寂逃名亦拘墟遇物勿滯  
迹永言抱冲襟攸往道自適

初到定州

又逐輪蹄過一州年來蹤迹類萍浮詩書有味人忘老草木

無情歲易秋一飽且營臣朔米卅年猶贖晏嬰裘自憐病骨  
支離甚孤負清漳盼故侯

費丙章

原名進字新橋仁和人嘉慶戊辰進士官至河南布政使

府志丙章由翰林改御史出為廣東雷瓊道飭吏治與文教捐廉率紳耆助修書院拓講堂增學舍建宋五子祠旋提刑粵西領藩楚北以母憂歸再起為河南布政使時漕務總運官有節省銀三千兩歲充藩司公用丙章屬開封知府悉以買穀建倉儲之且立為案俾後來者歲得增益名曰司備倉後河決發穀民免于飢

西湖柳枝詞

長短隄邊柳萬條分行低映鎖瀾橋小船撐過茅家埠春水

新添一兩篙

湖上風飄楊柳花總宜船繫綠陰斜黃鶯聲滑留人醉半在

西陵賣酒家

垂柳垂楊覆嫩煙種來多在六橋邊風前莫被人攀折好送

清陰胃書船

錢

林原名福林字東生一字志枚號金粟琦子仁和人嘉慶戊辰進士官翰林院侍讀學士箸玉山草堂

集

府志林才力敏贍每給札

殿

庭頃刻立就少時學問淹博于書無所不覽在詞館日

一書與在丑寅之交燒燭讀書無間寒暑著文獻徵存錄

州王藻為

定香亭筆談金粟綜覽經籍兼工詞翰下筆  
幾速刻暑可待華實並茂之士此為翹楚

李代國刷馬圖歌

四十佩銀印與作開國公垂鞭陰山還願盼生長風即看未

遇身在下亦是縱橫不羈者百金腰下青脊劍一匹階頭紫

騮馬曹家白鴿非我儔刷取毛片橫雙眸虬髯當時正在坐

四面山色凜若秋固知愛馬如愛士要令低頭聽驅使嗚呼

太原李公子拂拭英雄亦如此

韓蘄王策蹇圖

將軍少日爲走卒豈料刻印封王侯荷戈碌碌在人下得飯  
一飽死卽休忽然騰蹕青雲起麒麟殿前拜天子十戰五戰  
皆先鋒冠軍將軍無乃是姿何颯爽褒鄂同懋直又有前人  
風曾聞坐法辛慶忌肯學徙邊陳子公拂衣竟爾還鄉土甘  
向田閒作野父杖策今朝自跨驢射生當日能擒虎君不見  
北平太守豪且賢年年手弓常在邊一言偶失勳貴意對簿  
自到無人憐以茲老住江湖上落落長歌益疏放父老能談  
京口兵朝廷竟棄山西將畫工作意何太深手拊髀肉如沈  
吟請看鞞上蒼鷹意常有雲霄待用心

送鄭八之山東

憐君方試吏未肯作州民白事將趨府青袍但裹身吟詩芳  
杜好怨別綠楊新明日看容鬢秋風不惜人

桐廬晚泊寄陳大兄

沙上忽聞雁江頭難寄書故人方遠宦遲暮復何如倚枕鄉  
初近挑燈歲欲除潮來且須住未得過桐廬

題屠琴鳴太史雙藤老屋圖卽以贈別

東風入簾芳草生與君握手杭州城藤陰在地香滿陌與君  
同作長安客花開未闌酷正新一鞭更欲觴征塵城南尺五  
去天處可惜落花空自春

石陂荷花蕩聞笛

碧蘆遠水淡無煙笛裏何人晚泊船不待西風起南浦爲君  
吹折半湖蓮

懷人詩 錄二

風引雙旌度玉關 臨歧西望悵離顏 誰能更作還鄉夢 萬里

黃河一片山 沈武威震

清明寒食味淒淒 細草狂花古尉犁 頭白孤臣易垂淚 不關

萬里望金雞 全太守

陳傳經 字晴巖 海甯人 嘉慶戊辰進士官翰林院編修

吳衡照曰晴巖幼聰穎甫成童補博士弟子員為諸生三十年赴試北闈中倚願館選未幾卒年四十有七

月夜坐竹素園對殘雪

積雪未肯消 留連待明月 客子懶無寐 相對正超忽 亭抱孤

影 圓徑露凍痕 缺檐北冕林 梢池南淨山 骨極天銀汞 流射

地 玻璃滑虛廊 風悄然清氣 逼毛髮 鄉園春欲生 短夢飛難

越 不知山館裏 梅花幾枝發

山塘

花影靜詩夢水香邀酒情山憐秋後澹月怕客邊明畫舫虛  
前度浮鷗笑此生揚帆吾已倦多事曉鐘聲

查元儼

原名有筠字德敷號又山海甯人嘉慶戊辰進士官貴州道監察御史著存齋詩存

許莊祥日又山先生官諫垣有直聲遇事敢言道光甲申河決高家堰糧艘壅滯災黎塗塗先生上疏請通海運卸流民効河漕積弊

朝廷報可果復海運旋以病乞歸仰承先志捐助義莊錢五千緡舉

族利賴之

諸泥歌詰泥質似玉色似墨圍三尺四寸強厚一寸弱

襲之當晴霽時取以觀日極赤無芒可諦矚也襲面有明董墨林隸書云此物出博桑國之蕊陽山數千載受日之精凝結而成故惟日光可洞達古人用以察日之稜祥且辟疫有神效真希世之寶也歌以紀之

蕊陽之山何亭亭中含太古元冥精非石非玉光晶瑩洞見



西江車車續金 卷二十一 十一  
皎日金烏形昔堯命羿射墮靈丸華晃昱眩目睛羲和陽谷  
貢厥瑛枉矢一發搏桑清流傳百世等球琳祓除魑魅冰鏡  
澄燮理陰陽疇勒銘民無天札底太平方諸空含月魄盈陽  
燧徒襲燭火明何如諸泥視不瞬但覺臙脂紅暈玉盤頰應  
侶璇璣明堂登九如爰祝日之升扣槃捫籥嘯羣盲目無私  
照常見黃道行

月夜登焦山

乘月問仙靈遙峰俯畫屏星辰四野碧江海一痕青臥雪仙  
留蛻磨崖鶴勒銘還思京口酒一舸訪中泠

明季雜咏

碧玉腰圍素蟒解便傾瑤草奪中權可憐一曲春燈謎司馬  
兵符枕上傳

雙引河淮作帶流連雲甲第侈封侯將軍慙愧章臺柳一騎  
紅妝到薊州

竊得花枝江上開乘春談笑上蠡臺健兒悉擁紅帶醉潑水  
刀光斫帳來

刺血江邊草檄時定盟親捍赭山師伊璜莫挽虞淵日先甲  
憂危幾卷詩

吳乙照字子校海甯人嘉慶戊辰

海昌備志乙照官福山知縣至之日值歲饑且疫施棺

給藥發倉以振故多盜禽治尤桀黠者城東河隄圯捐

廉重修泄事逾年稱良吏以母老乞歸

遂不出熱精周泰諸子校錄多精審

吳衡照曰吾友鄭晚晴庶常城與子校同年進士戲謂

子校曰君有晉人丰裁無漢官威儀二語真足為子校  
傳神子校個個無華刻苦自勵在山東有句云浪迹似  
萍偏有蒂歸心如箭不離弦其宦况可知已福山古之  
果地有李斯篆碑今仆於海濱賴大樹枝岐夾住  
得不墜子校擬舉而立之帳轉未就亦恨事也

吳敦跋先大夫自少酷嗜陶詩兼及王孟韋柳同邑張荔園先生云氣清而腴味淡而永無塵俗語擾其筆端斯為逸品嘉興錢新梧先生云五古有陶味五律近唐音

題馮書巢看山圖

龍山天矯如一龍出鱗露爪成奇峰君家距山不咫尺春看山容冬看骨昨來示我看山圖陡起一峰凌坐隅別有數峰互掩映邱壑洵與尋常殊我本愛山入骨髓六年羈宦傷千里明朝著屐度雲深滿眼風塵憑一洗

暮過山家

參差綠蘿裏茆舍隱朦朧山果垂檐熟野花夾徑紅我來不識路隨鶴偶然通便借北窗下泠泠一榻風

程孝子以八秩索生挽詩賦贈

程孝子名一飛字秋雨居陝川之南山小桃源

素有孝行人稱程孝子

岡陵何以固其固在根基松柏何以茂其茂在根莖孝爲根  
本地此理人所知八旬秋雨翁素行篤庭闈艱辛營甘旨晨  
夕奉母儀不惟生敬養沒身恆不衰卜葬審山麓畚掬親操  
持邱壟日展省霜露銜餘哀而今已八十九衰行復開賓朋  
爲翁祝酌酒正盈卮翁意不在酒婉曲訴襟期大椿奚足喜  
朝菌安足悲夭壽本前定僕復何所祈惟痛七十時已不舞  
萊衣祇今又十年窀穸願相依諸君蒙見愛爲賦生挽詩薤  
露及蒿里大筆能爲之自翁一言出滿座皆歔歛賀也而又

弔人將曰何居箕請誦南山篇乞免挽歌詞

錢武肅王太湖龍簡歌翁廣平跋順治元年夏旱太湖

龍簡蓋投水府之告文也其文一百八十九字楷法

頗似麻姑壇記四旁有一龍環之其質銀重二十兩  
雍正中先外大父拙齋沈公欲以銀四十兩易之  
不可乃假榻數十紙藏之後聞其子已鎔之矣

五月渴龍吼太湖湖心一噏湖底枯舊投銀簡今復得神物  
那許沈泥污曩者錢王鎮吳越兵戈蘭錡民歡呼名山洞府  
徧醮謝時投簡不一處簡飛驛傳姑蘇閱年七百歲大旱象罔  
乃出淵中珠白金修廣不滿尺百八十字皆完膚體結蠅頭  
勢適逸格法顏魯兼宗虞惜乎耆儒嗜古購不得眼看一擲  
歸洪爐塌來故人示拓本蘭亭雖泐存形模細審銜名年月  
日要與史志俱相符所疑盟府鐵券日益蝕茲迺纖悉無模  
胡得非水府寶珍惜多年守護煩天吳若云金之在水百不  
壞射潮不記彎强弧請拾三千金僕姑

梅花嶺史閣部墓

訓練徒勞兵餉空淮揚分閫獨臨戎南都莫保偏安局東閣  
羞稱擁戴功跋扈諸軍調四鎮精靈終古伴雙忠

嶺有雙忠祠祀文忠

山山 崑山崑山 帝陵帝陵

當年袍笏招魂處  
咫尺鍾山帝座通  
太祖陵在鍾山公  
遺書云死葬高皇

錢儀吉

字藹人號新梧又號衍石福  
辰進士官刑科給事中著刻楮集四卷  
旅逸小稿

卷二

府志儀吉十二歲效選體作山賦千言張問陶擊節稱  
賞庶常散館授主事升給事中遇事無徇庇人憚其丰  
采因公鑄級絕意任進主講粵東學海堂河南大梁書  
院治經講求故訓著經典證文說文雅厥流覽乙部以  
章武偏安暨大業末造典禮缺如撰三國晉南北朝會  
要病通志堂經解采摭未備搜羅宋元來說經家彙經  
苑一編臬比數十寒暑有仙蝶齋藏書所自謂吾之  
長技但可鍼灸文字耳與從弟泰吉稱錢氏二石  
緝雅堂詩話衍石先生曾游廣州屢閱學海堂課卷手  
定諸生讀書法四條至今仍之記事彙中與吾鄉先輩  
論學之語用心甚長自恨生晚不及奉手受教少從  
番禺陳蘭甫先生游粗得梗概錄詩已畢書此志慕  
海昌周松霽先生箸佛爾雅予求之有年查春園別駕

頃以寄惠賦謝四首

昔聞堅素

先舅氏餘齋先生

稱周子頭白汗青多苦心神琪圖中生

慧解仙民讀後演經音劫灰久失元時硯芳草長懷海上琴

先生撰十三經音畧墨守字母剖析微茫嘉慶間已刊行嘗藏有耶律文正硯不知流轉何所又工畫蘭屢於舅氏齋中

見之豈謂小編猶待訪故人天末慰書淫

名言路斷見真如石室清源乃有書寫向杪羅難祕密拈來

藥草此權輿儒流海茹非為佞佛語瀾翻定不虛當日多聞

升上座一音隨類了三車

開函朗朗鬱單珠唐梵縱橫盡識塗州守應教解蕃語奎章

何用畫神符魚山空際尋聲在龍樹傳來得髓無領受環中

一家學不勞周史證南謨

明環中迂叟陳士元撰象教皮編此書體例畧同南謨見避暑錄話

听然坐我梵音天授記佉盧在眼前識字緣難空世諦逃禪

味已通中年洪州綺語無然悔涑水真言不落詮為是擬經

還說法槃陀一卷也流傳

先生自序謂聞朱石君中丞撰佛

所集如來孝經底

本將錄寄春園

病起晴二首

三冬太暄暖二月始寒威鶯燕寂無語雪風時作圍春心默  
惆悵花事少芳菲今日披晴喜南窗倚午暉

人生那最樂無事值春晴啄雪弄禽語哦花招友生芳郊知  
綠滿病榻先詩成未及韶光半從容待出城

生朝五弟爲置酒竝招杏村同游法源寺二首

久忘纓絡尙風塵馳驟年光及暮春貧可爲歡煩令弟老思

問道屬何人古情眼底摹科斗飲閒閱古銅印百枚鄉味朝來獲巨鱗

底用臨觴較今昨座中言笑孰知因

歲歲春風闕化城教忠臺下屢經行空王何力能銷恨賢相



當時諫用兵一縷天香如結願千年殘墨又鐫名白小山侍

磨將軍碑庭陰選石同敷坐花氣猶憐倚午晴

津門泊舟處聞人稱前宰周君栻政之美惜其去也

予未嘗識周懿好是同述之篇詠

津水聞廉吏周侯藹去思檢荒官罷後解印獄空時交臂恨  
相失苦心終見知斯民華袞贈何羨擁旌麾

泊湖鎮

黃花娟娟媚白石十五五岡阜赤亭亭孤墦立當窗墦頂  
迴翔鶴一隻殘梅彌岸春霧陰維舟日暮愁人心不知何處  
龍邱隱清皎湖流日夜深

吳增嘉字昌之號小匏歸安人嘉慶

府志增嘉博覽宏通工詩古文罷官後寄居  
直隸以著述自娛於左氏杜注用力尤深

題謝信齋梅花硯圖

寶硯齋中富蓄硯此硯乃于圖中見一枝梅放硯池邊拂拂  
幽香生尺絹省郎嗜硯得硯喜楊郎詠硯詩更美怪他作合  
信由天宛轉紅絲繫千里查田太守最憐才見詩擊節心顏  
開吾家自有傳壻硯安用溫家玉鏡臺貯以琉璃遠送行香  
飄八桂會雙星侍兒捧硯長眉畫獨秀峰高一樣青好事者  
誰憚鐵簫精能畫品詩情超名流簪集各題詠朱絃疏越明  
珠跳硯乎眞是氤氳使氏妣參媒一詩替所嗟原唱失流傳  
未免斯圖成缺事寒暑怱怱幾十年一朝流轉到幽燕稽山  
小謝風流甚再結人間翰墨緣披圖展向晨窗淨摩挲細讀  
尋名姓十八人中出處殊爲尊先輩同恭敬昭陽荒落算支  
干已入齋中結故歡仙源一跋何爲者合作詩中錯簡看齋

中之硯端歎全後玉帶生賢乎賢白華絜養延年樹佳氣充

閩種玉田梅花之硯若竝得更低吟得寶編

竺之侃

字可陶號鸞齋鄞人嘉慶戊辰進士官金華教授著歷代名臣詠

縣志之侃成進士以知縣改金華教授日與諸生論文講學士風一變束修外不名一錢節縮所入以周親族

之孤寡既歸里修先塋立祀田皆獨力為之

明代名臣詠

勇哉常十萬功為諸將先彭蠡縱火擊采石揮戈前用兵與

古合智足勇亦全觀其罪邵榮大義何凜然常遇春

陽明一代豪天授非人力適寇為肅清孽藩即破滅前受忠

泰誣後遭桂萼嫉良知非異言崇祀昭明德王守仁

文士善治兵言戰不言守三賜尚方劍姦臣苦掣肘殘卒當

大兵隻臂無援手麻衣白綱巾死狀猶待剖盧象昇

抗疏訟東林羣賢稍登進力請燬要典三案公議定見用已

太遲支紕理朝政南都尙可爲一死乃吾分

倪元

張作楠 字讓之號丹村金華人嘉慶戊辰進士官

縣志作楠教旋選桃源知縣調補陽湖治事廉平能以經術

補律意遷知太倉州會大湖溢州境積潦未退既請振

借帑平糶開瀏河以洩水涸出良田七千餘頃州人刊

婁東荒政編紀其事時海濱姦徒乘間抄掠適作楠捧

檄獄人悉就擒受知巡撫陶文毅奏補徐州知府徐

亦破災命赴任籌振岷賴以甦公餘孤燈夜課如寒素

未幾歸居鄉二十餘

年足迹不入城市

鄉賢錄先生表彰鄉先賢遺書用活字板刊行施豚章

幼爲牧樵兒先生成就以名孝廉官戶部主事里鄰

聞風相效其署兵備道以父

病告養去官父歿哀毀泣血

金華詩續錄丹村稟異質敦內行理闡程朱學探河洛

著有四書同異二十卷鄉黨小箋一卷證文一卷翠微

山房文集十六卷數學三十八卷書目五

卷筆錄識小錄愈愚錄東郭鄉談無卷數

同斤齋子讀錄

卷二十一

張作楠

七

謝駿德曰丹邨太守好表揚人物著書存者補唐仲友  
傳有功德先哲舊雨錄北麓詩課故人之詩藉留一班書  
 事存稿遺事藉以流傳梅籜隨筆可補枯  
 郡地志之闕詩文稿未梓咸同間燬於兵

珊架軒留別徐何二生

我本鹿田樵忽作出山計出山仍在山欣然愜素志野鹿性  
 不馴強我就鞍轡五斗竟折腰三年等匏繫徐君知我者家  
 在白雲際酒熟黃花開打門送急遞欣踐漫郎招來搨珠山  
 翠矯矯何六山歡迓履倒曳坐我松竹閒炙輶酷尤致觴政  
 不嫌苛酒軍懲失利孽賤傲禁體射覆參雅戲不覺玉山頽  
 夕陽已西墜瓶大瓶罌小所受原各異為帽不為錦於世期  
 有濟嗤子處其閒久疏泉石契鼠雀偷太倉仕隱兩負愧輪  
 君遠市囂橫經還負耒卜築面溪山談詩聯萼棣涼風裊修  
 篁吟蠶咽寒砌翦燭話勝游溯洄不忍置栗里倘相邀籃輿

期再至莫聞剝啄聲訝是催租吏

少婦別

鴛鴦戲池中雙宿復雙栖兔絲附喬松榮枯不相離松僵兔  
絲折池涸鴛鴦飛飛戀舊巢交頸雙雙哢婉彼少年婦窈  
窕好容儀十三學採桑十四躬織機十五爲君婦黽勉供鹽  
齋百年共甘苦白頭不復疑今春愁乏食借典鄰家衣擬待  
秋稼登持作取衣資亢陽陡告災仰屋歎南箕朝啖野草根  
暮剝枯樹皮轉眼秋風涼鄰人責瓜期倉皇計無出忍使儂  
去帷但得一家飽敢惜陋劣姿奈我雙翁姑髮白年已衰禦  
食無寸絲膚裂何能支更憐出腹兒生小慣嬌癡前來抱我  
頸猶索棗與梨儂去渠尙幼冷暝誰見知開儂破竹箱剩有  
雙履綦故衣雖藍縷補之尙可披稚兒雖嬌癡幸念儂所遺

憐渠幼無母教之勿加笞語罷聲嗚咽牽衣泣路歧悽悽姑  
別婦慘慘夫別妻依依子別母哀哀母別兒杳杳蒼天高黯  
黯愁雲低生難復來歸死當長相思

景陽宮詞

景陽樓上鐘聲止六六宮人盡梳洗君王晏起拂御牀左攬  
望仙右結綺傑閣三層矗太空鴛鴦瓦織青芙蓉娃館三千  
盛遊幸歌樓十二穿簾櫳複道重重跨樹杪風膩綠雲春縹  
緲雉尾光分寶扇開鳴頭篆惹爐煙繞緩歌曼舞黃金杯壽  
向暄春望幸來蓮花籠燭輝輝合梔子裝囊細細開就中娥  
羲樹四后雲鬢花釵鬧清晝玉容第一張麗華寵侍瑤臺掌  
朝奏晝漏遲遲宵漏長承歡侍燕久專房朝朝菡萏承紈扇  
夜夜茱萸醉玉觴玳瑁梁飛南內宴傳呼聲轟光昭殿貴嬪

龔孔兩梳妝後庭玉樹遮嬌面屑桂塗椒色色香黑頭宰相  
奉明光翠箔銀屏急絃管瓊枝璧月照衣裳笑倚隱囊傳敕  
旨珥筆紛來女學士貴人織錦遞瑤箋狎客題詩屬流水至  
尊含醉步前楹詔采新詩叶鳳笙鳳笙吹徹臨春樂一絲裊  
娜春風聲轟天打破花奴鼓渡江競報韓擒虎內殿譁傳告  
急章大家猶按填詞譜戰血淋漓宮草丹倉皇入井晚妝殘  
陣前粉鏡容沾涕地底珠衣不道寒鄒枚故館泣妖狐趙帶  
燕裾散五湖舊內定纏長命縷新宮枉結辟兵符樂游苑樹  
荒涼處落月淒然墮如雨關山唱盡傷心曲節拍拋殘行樂  
語豈獨陳亡隋亦亡江都錦纜結垂楊由來傾國饒哀怨漫  
詫人閒樂未央

催租行



黃豆登場子如霰豆價日昂錢價賤富家健僕索豆租佃戶  
垂頭兩股顫自從亢旱顆粒無秋雨如塵泥不陷菜圃蟲多  
僅有根蕎花鈴小難成麩豆田十頃土塉塉種不出土誰望  
斂健僕聞言顏色變云我有田爾有佃今歲同爲苦旱人我  
猶窘急爾甯便昨聞勘驗不成茨縣主升堂追逋欠但說租  
難按畝收豈忘糧實從租辦君不見前年大水秋無禾蒙  
恩蠲免停催科文書山積那免訛計田則少糧則多仍拏尾  
欠奈彼何

後趙宮詞

銅雀西連金鳳臺魏王去後趙王來三千女監層樓上遙指  
官家射獵回

百丈緋繩轉轆轤綸章五色映華裾千官翹首層霄裏金鳳

銜來紫詔書

七尺雲鬟曉鏡中  
夫人門第廣陵公  
華林春盡看猿騎  
共道才名冠後宮

牙桃枝扇夾鸞輿  
綵幔雲移錦不如  
三月三朝臨水會  
金隄爭看女尙書

九龍銜水躍清池  
浴室三門製絕奇  
報道官家齊賜浴  
顯陽殿裏月來時

襄國年年幾度巡  
離宮四十待遊春  
如花美女嬌成隊  
爭拜黃門宿衛塵

曲蓋翻飛獵輦回  
一千女騎踏雲來  
風飄紫袴鞭敲鐙  
笑指城西閱馬臺

大茱萸映小茱萸  
玉簫新編五采蒲  
衣絡珠璣酣舞夜  
香風

颯颯動流蘇

紫閣笙歌十二層排空複道欲飛騰深宮六月涼生早冰井  
臺前看賜冰

殿燃百十二枝燈中有檀車奉聖僧木偶添香龍吐水宮中  
爭拜佛圖澄

寄衣篇

有某甲者久客北平妻每歲成衣北寄今秋衣到甲死已數月計歸母子相抱痛哭余哀之因

此作

蟲唧唧催刀尺念游子淚沾臆冬成衣寄北平北平風高妾  
心驚念我夫子久作客日日計歸程一再拜告丈人爲我寄  
衣到塞北歲歲寄衣不見夫歸不見夫歸心惻惻一在南一  
在北使妾長相憶丈人將衣去歸客將書來讀未數行舉  
家悲哀夫子有遺言言寄妻若子遠客二十年財凸身又死

我病爾不知時我死爾不知日爾飢爾寒誰視爾與爾永訣

憑片紙

解三

妻若子頓足號且呼不見故夫但見手書持書於

邑肝腸斷絕爾病我不知時爾死我不知日使我夫妻父子

不得永訣

解四

妻哭夫兮子哭父母哭兒孤兒哭母苦三千里

外雪霏霏誰收爾骨歸黃土

解五

南城夜雨讀昌黎縣齋有懷詩喜陳慎齋書至即用其

### 韻答之

孤燈暗客枕涼雨添怛咤我來未插禾歛名已納稼有懷嗟  
莫陳無客何須謝焚香展韓集古墨輝龍麝故人惠雙魚千  
里託鴻駕問子賦三都可長洛陽價又云君屬辭敏速若注  
射方驚七札穿胡難九州霸客途慎風霜世路防變詐綾餅  
恩未沾蓴羹鹽可下歐九雖工文劉四當慎罵人文萃

輦轂朝宗同澹灞炫美物所忌耐辱身斯暇慚予懶成癖冠  
帶苦拉豁狂鍛山陽爐快伏淮陰膺腹枵昧金根性頑稱僕  
射才原媿雞碑賜敢忘鷲炙此行縱有得亦便卽請假買船  
東窺溟蠟屐西探華賦瀑練垂霄觀日輪飛夜歸來得雄誇  
以此豪朋姬握手續前盟文陣同控靶鯨吞酒百壺城擁書  
千架二者無一遂苦憶故鄉禡談舌劍推鋒歸心囚望赦懷  
人空有書避熱真無罅燕麥難療飢狐裘豈禦夏柄鑿異方  
圓顏色誰相借差幸沾無錢不醉醒奚怕味貴美於回情當  
鎮乎乍雲夢遊固雄何必烏有詫君今漉肝肺反覆來慰藉  
不問黑貂敝深恐素衣化頓觸我鄉情繞園憶桑柘方今  
陛下聖策士瀛洲榭東觀立五部成均廣萬舍鵬搏鷄敢笑  
鵠過鴟甯嚇茅茹難我占蒲輪定君冠紗浣越溪女錢數河

閒姹寄語待年人及時須早嫁

招夢用一送全韻 并序

曹立人沒後時來入夢歡若平生今慎齋死數月矣  
玉樓一召靈蹤杳然豈予情未深耶抑諸天樂甚不  
復念故人耶寒夜無眠淒然感逝因憶慎齋近好爲  
全韻詩遂拈夢字作詩招之庶幾其能來乎

人生一夢耳聚散真倥偬覺時胡罔覺夢中迺占夢嗚呼我  
慎齋翩翩丹山鳳確犖見風裁食牛氣驚眾十年其燈火空  
山採蕨蕪汗血馬西來擊海鯤南徂雲龍忝追隨寒暑劇磨  
礱遺君釣詩鉤報我益智粿一罇辨淄澠兩水分章漬源必  
探宿海典豈譌從陸閒申鷗鷺盟時效鄒魯闕拔幟各揚鏹  
斫陣同飛鞚君乃盤馬來一發七札洞精銳走雷霆雄闊吞

雲膏洵足空古今亦復誰伯仲君作鷓鴣舞予奮博勞爰情  
方擬投膠禮歎悲讀贈時去箭離弦人凸魚脫綬而胡一蓋  
棺往事成虛哄苔砌咽吟蠶野館霏寒霧歎逝心獨傷不覺  
淚如渾悲人徒自悲痛定還思痛竊擬景差招用慰羊曇慟  
盤山昔聚首墳典恣裁衷古調摹妃豨新交戒諛詞談罄蠟  
成堆兔秃筆盈甕夢兮歸來乎握手再吟諷坦濱昔游地古  
木翳如幪一彎碧水斜四面青山醜桐陰臥涼月楓林蹋霜  
崧夢兮歸來乎再聽鳴禽哢北麓昔聯盟繞獵紛鴻網笙磬  
咸奏聲琳琅盡包貢探驪時有得喜逾千鍾贛夢兮歸來乎  
蝨心期再中西湖昔讌集梅柳相迎送畫舫奏清歌煙波搖  
綺棟箋擘蜀江錦酒斟琥珀凍夢兮歸來乎臨風笛再弄粵  
聞古仙人翱翔天宇空華表鶴猶歸茅頂鸞堪控翩翩馬旋

風颯颯雨飄凍玉樓如有暇來慰予心恫

馬

基

字秉初錢塘人候選同知

楊振鐸曰嘉慶九年阮文達撫浙修杭州水利畧中載是役以馬基知水利身任其事經營十月而工乃畢  
中丞阮公命探討杭州水利因稽司水之神各致香火

分紀靈蹟凡三篇

靈宇孤山麓香風開妙蓮池上白皮松戰風勢蜿蜒神兮主

潦旱歲熟西湖田寒泉薦秋菊配食來逋仙

水仙王廟

寶月山峩峩仙宮肅靈祀月為水之精乃孕石骨髓巨魚長

如人宅此金龍子井中一滴泉山下一尺水

水神廟

小小水晶宮菰蒲涼瑟瑟背城起層閣畫水作緇色壓勝鎮

坎方禳火俱多術倒挽南湖波沛然澤下尺

水閣星

唐鳳儀

字天宇號雲樵錢塘人官江西進賢縣丞箸雲樵詩鈔



杭郡詩續輯雲樵入方畧館寫書以勞得官補當  
塗丞母憂起復補進賢丞兩攝尹事有聲于時

### 湖陽晚渡

日落搖雙槩輕帆去似飛雨多青草沒湖闊綠萍稀一鶴天  
邊唳羣鷗煙外歸放懷蓬底睡酒力莫嫌微

### 李若虛

字實夫錢塘人官貴州正大營巡檢箸實夫詩存四卷

府志若虛官巡檢失囚去職游蜀中川督孫士毅見所作詩激賞不置由是名譽大重游烏斯藏距蜀西邊萬數千里繩行沙度窮厯荒砂故所作詩多雄偉悲壯之氣別撰海棠詞稿賦柳豪蘇兼有其勝周藹序畧實夫負雋上伉爽之姿弱冠有蕉綠軒詩卷壯年曾赴西歲籌辦巴勒布邊事以才幹稱前後凡四至途中風物寓之干詩皆雅贍可誦

### 重至札什倫布與札薩克歲琿堪布話舊

憶昔辛亥年邊氛擾禪榻囊筆萬里來瘦馬行沓馭駐軍青  
豆房重譯語紛還羽書劇倥偬轉饜問老衲往復幾一載意

協情亦而功成各分手恍如飄風颯君仍事禪定余亦解鞅  
鞞滙角各一方無由作酬答流光何在荏瞬息八僧臘我復  
叩禪關舊雨喜重合精進探深微莊嚴復古塔話長覺漏短  
三更翦銀蠟屈指昔年人于今半摧拉感慨付一映壯懷轉  
嗚咽諸有卽諸無何勞念紛雜爲歡且復共馬湏配蠻榼梵  
唄尙依然桑林無怖鴿賈胡亦何人三友卽朋盍

哭張石虛 并序

張位中上海人爲射洪令賊起調大竹令當賊氛者

四年竟歿于陣

宕渠有循吏張公能用兵賊氛四年擾白芳驅鄉丁同仇勵  
大節壯志矢力行誓將滅羣寇豈獨堅孤城我曾兩過訪氣  
勇身伶俜民恐失寇恂危疆羅頌聲郡邑皆斯人何慮盜賊

橫昨聞戰場歿一慟傷我情頻年論勞績爲君常不平廉吏  
櫻逆鋒墨吏尙營營可憐鳳樓手齎恨向九京生死雖可悲  
忠烈實匪輕同時王南部贊武死難亦光明英靈殲逆魄相倚  
如弟兄

曳鐘行 并序

署前小阜舊有古覆鐘土人云是飛來者今年初秋  
大雷雨一夕撲墮阜下民百夫曳之起六足觚稜字  
漫漶不復辯隱隱有順慶路總管某官字按宋始改  
天下爲路順慶舊屬梓州路後復改順慶路但無從  
考年號耳作曳鐘歌記之

百夫合沓聲嗚呼白足曳牽行泥塗身非曩曩力能撼蒲牢  
倒覆鯨波枯果州山城古竇熨分無神物歸隩隅土培纍纍

壓城缺望之不覺同侪儒鏞鐘脫落幾今古土花蠶食苔痕

麤俗人指點說幽怪不脛亦走來天都橫飛搏擊攫龍鬪曉

看巨迹留真符

宋徽宗政和閒靈覺寺鐘一夕飛去居傍人言灣中每夜有聲謂必與龍戰也寺僧鑿去

頂上龍角乃止至今灣中風起有物如車輪作青黛色湧出波心

或云此物更千載紛紛輿

論相陳敷今年六月恰逢閏旱魃跳躍黔黎吁萬民泥首望

瓊闕叫穿閭闔攀龍須始知造物有仁術傾城霖霖均涵濡

雷行電掣助神力一夕飛瀑噴瑤珠南阡皆盈北郊滿溝澮

汨汨流清渠忽然高嶮震轟剗華山

鐘名

傾側人難扶蹶沔屈

蠖狀淹滯五丁滅迹金牛無平生好事絕嗜古欲覓象罔探

河圖須臾露追竟跋足拂拭浮垢尋規模觚稜六足亦奇異

粟斑隱隱光縈紆層層薛蝕色妍潔髣髴餘字猶堪摹就中

名存順慶路銜款不辯官階臚乃知天水寶鑄此誰與鼓氣

開洪鑪是非諧人合鼻氏或亦祈福建浮屠不然臨江作壓  
鎮桐魚一撞鳴雲衢更無元號認丁甲千秋帝業今全虛吁  
嗟此鐘遺留迄今六百有餘載今人欲考終模胡不知石鐘  
之山隱無迹噌吰款坎鞳鞳一任水石相哮虜

高靖江王德符招游善果守看牡丹歸至荐福寺登小

鴈塔

六年飽看優曇樹半載重尋上苑春三月行人過三輔長安  
道上車麟麟朋簪共訪曲江去杜陵野老今何人城南尺五  
去天咫風吹麥浪如魚鱗慈仁荐福但遺址只餘雙塔搖風  
輪游人指點興善寺此中花事猶鮮新相攜便作看花客況  
復風日逢佳辰入門先摩斷碑古探討陳迹披荆榛勑由晉  
隋厯灰劫代有興廢皆前因靈花忍草後來秀花圃遍挂紅

球璘靚紅勝紫都姬姹歐碧一種尤奇珍素面如盤最鮮潔  
白毫光裏花如銀姚黃我曾西域見賦成綺語酬花神倘教  
移此合五色爛漫相鬪堪儕倫汲泉煮茗話前事石臺藉草  
同香茵鳩摩竺法去已杳拈花欲證何由循或云且登小鴈  
塔終南佳氣連城闐憑臨翠堵弔千載彷彿釵珥施宮嬪此塔  
為景龍中宮人施金繪所造斯游偶爾來勝地一笑且放雙眉鬢明朝又  
向成都去依舊花溪老病身

和太庵少宗伯巡閱後藏

介壽頌生佛謂班禪人生得未曾投醪千虎賁祝嘏萬禪僧覓  
句長生瓦攤書無盡燈更探三乘祕花雨眾香騰

姚壘伯

字隱壘仁和諸生著韻梧山房詩稿

王同日隱壘少游星橋太守之門稱入室弟子家塘樓世以奇藥濟世姚丸之名馳海內隱壘上承先業偶及

詩文亦  
自可誦

泊甘墩村

薄暮碧溪上扁舟歸路遙  
鷺移秋水岸僧醉夕陽橋  
訪舊思攜屐看雲或住橈  
春來千萬樹何處最魂消

吳山吟館題壁

此處卜棲遲偏于野客宜  
鐘聲鄰寺近帆影隔江移  
積雨敲松蓋繁花補竹籬  
偶然來此坐湖海有心期

金

楹字覺夫號雨香仁和  
諸生著嘯月樓集

杭郡詩三輯雨香少負雋才詩以漢晉初盛唐為宗卒  
年二十九世以徐昌穀比之兼工詞有味蘭琴趣一卷

姑惡行

姑惡姑惡婦難為  
良人早沒小姑癡  
婦暮職春晨職炊六月  
無雨旱風起汲井得水半泥滓  
小姑飲之先不喜姑因責婦

婦何辭小姑會有為婦時婦在家時母亦慈

憶毛佩芳

海內知交半隱淪就中才絕是伊人閒吟已得風騷格卜宅  
偏於水石鄰落日西臺堪散髮清風嚴瀨好垂綸終當一為  
蒼生出莫泥青松與碧筠

姚承憲

字秋茫思勤子仁和諸生著嶺南游草瑣香吟館詩稿

丁丙曰秋茫乘春綺先生庭訓詩才絕勝就白小山學使之聘偏歷粵東與諸名士酬月評花幾忘羈旅漢水

邗江亦經游歷奚囊所積悉載集中

湛若洗硯池

在光孝寺

我昔曾讀祭酒詩迺知湛若洗硯池覃溪好古有拓本三字  
大書四尺碑今我飢驅搗破硯檠筆亦到天南陔親來池上  
訪遺蹟一勺之水猶瀾瀾緬想揮毫灑餘瀋墨痕四結蟠蛟



螭此心如冰矢潔白此硯不壞堅攜持天生畸人必艱苦頓  
令絕域遙攀追鴉咋山高鬼門險手摩桐柱身忘危可憐百  
事煙雲散抱琴一死誰不悲海雪堂空付灰燼硯池幸在基  
無虧忠義之氣自千古獨有硯石名同垂明福洞深白雲杳  
祇覺謾謾天風吹湛若硯側鑄天風吹夜泉五字風旛妙旨  
頗皈信光孝寺爲六祖道場有風旛堂對此轉念偏滋疑一池水皺千何事  
慨然懷古心爲馳摳衣上堂佛無語回首還看清漣漪因緣  
恍悟文字外秃筆欲洗愁枯枝願分餘潤借杯水鶴鶴眼活  
人揚眉果然佛意默微示天雨一陣花紛披歸途興發不愁  
晚池上獨立吟多時

朝雲墓

點翠洲前柳影孤豐湖勝否比西湖命宮可奈同磨竭春夢

偏真過隙駒妙偈六如前果在香泥三尺落花無錢唐風雨  
家何處一錢寒泉合配蘇

姚

鎮

字敬甫海甯諸生

海昌備志錢塘屠琴塢倬宰儀徵時鎮嘗佐其幕論詩  
文甚相得所著詩文稿盈尺其子際生文海傾藏之中  
有論文三首敘古今源流頗詳  
晚嘗自選詩一卷刻之餘未梓  
蔣坦序畧敬甫力學好古有聲東南  
所為詩出入唐宋無喬宇鬼瑣之習  
丁文蔚跋畧東海多詩人自查伯撰祝簡田兩先生後  
又有應笠湖俞霞軒周梅坪諸人嗣響一時然頗尙塗  
澤至敬甫先生詩清極而麗質極而澹所謂噓氣成煙  
霞下筆絕塵滓者殆庶幾焉所著有歷代都邑考廿一  
史補遺  
均不傳

勘災行

聞官來勘災饑民馬頭立官曰爾飢否胥曰此富邑民曰已  
絕糧隸曰有餘粒官聽左右言掉頭不肯入飢飽在胥隸官

惟簿手執未勘民或飽餘米前臘積勘後民皆飢官過錢盡  
納官去報勤勞飢民夜相泣

官振謠

饑民半死振始聞縣官運米縣吏分饑民如彘吏如虎彘欲  
飽食虎大怒紅旂驅入圈牢中分米點籥何恩恩官中半石  
穀吾民一簞粥饑民腹未飽縣吏食不了官曰父母民仰之  
活我百姓良有司有司不救填壑死壑中亦有宦家子

流民歎

呶啞嘲哂雜笑談赤髮嫗婦鰲面男少壯肩頰走負擔不能  
走者擔以籃忍寒寂似銜蘆雁救餒喧於食葉蠶嗟爾流民  
胡至此云是漢江遭大水走遍天涯非得已填城溢郭入村  
里我見流民倍悽惻十年忽感飄流迹記從樊城下漢口一

日水長一百尺蒼黃入夜變漆黑明月亦沈星斗溼隱隱孤  
屋船欲投譁道危樓泊不得移船縛纜挂樹顛破曉開船樓  
已失吁嗟此景如昨日

黃東野

字子肩海甯人著履謁稿

杭郡詩三輯子肩少病失聰工詩善畫性孤傲不諧於俗精青烏家言著有不教子孫書凡六卷往來江南北無所遇晚捨其雙忠廟橋之宅名葆貞道觀即終老焉歿於嘉慶初年或傳其自沈於井云

同宗人牲珩

國琪

夜宿山館

敲枕不成寐山齋鐘漏遲殘燈三月盡細雨五更時擁被迎  
寒食聯牀論小詩年來精力減惟有故人知

錢泰吉

字輔宜號警石一號深廬嘉興康貢官海甯訓導著甘泉鄉人彙二十四卷

府志泰吉父復令直隸大典縣決獄慈敏有隱德泰吉就海昌冷官喜讀書著曝書雜記成一家言肆力古文詞與從兄儀吉咨詢學術動輒千言輯海昌備志學職禾人考有功文獻乘鐸二十餘年嚴身教整士習臨去

為州人攀留主講安瀾書院感化海瑞並追述先德纂  
清芬世守錄庚申粵事起仲子應溥迎養終于曾國藩  
幕

曾國藩撰墓表君少而苦學潛心孤往從兄曰儀吉字  
衍石者博通羣籍早有高名君事之師友之閒遠近盛  
稱錢氏二石云君自中年即好校古書假人善本及先  
輩評點之冊寫而註之眉端如史記前後漢書晉書集  
韻元文類禮記集說等編皆勘校數周一字之舛旁求  
取證嘗著曝書雜記以發其凡嘉慶中海內有尙考据  
之說尊漢而黜宋先博覽而後躬行獨桐城姚氏鼎格  
守程朱孤行不惑宗主義理不薄考据二石風指乃與

姚氏相近  
王拯傳畧先生既高材躡場屋自樂校官肆力為詩古

文詞大府計吏將以薦擢則力辭謝曰吾祖父皆久縣  
官實政在民吾故知縣令難為也然於民生利病講權  
深至大府廉其才嘗以開濬備塘河事屬之先生舉民  
所不便者為收言斷斷往復辭不預開河事既而牧乃  
大服勸修學宮集餘資為海昌備志成舉所得應旌義  
烈節孝子數百人達於大

府再三必得請而後已  
緝雅堂詩話警石先生學行純美覽其致兄給諫家書  
增友于之懷當時二石之名盛于海內不獨曉徵晦之

專美于前也曝書雜

記會稽章氏有刻本

題謝厚菴參軍蘭生思忠景忠兩錄

謝君昔日曾從戎軍門論事驚凡聾有手恨不能殺賊濡染

大筆思勸忠凡死夷難盡箸錄託始吾浙之甬東姚知縣懷祥

福建侯官人全典史福甘肅人李縣丞向陽雲南昆明人先後死

朝廷重寄果何人漫言死職無文臣不見乍浦同知韋逢甲

山東人上海典史楊慶恩山陰人與夫運餉知縣顏履敬甘肅人皆

不避賊圖生存事聞荷

襄卹乃其武臣死難同蔭其子孫武臣首數陳提督化成人

吳淞作鎮若山岳壯哉至死猶橫稍從之死者有六忠韋印

金玉龔齡垣許林許攀桂徐天華皆領官兵亦與其難福錢不愧

將軍之部曲廈門與虎門大角連沙角閩越諸將多死提督

關天培總兵江繼芸祥福三後來甬上四鎮亦卓犖壽春總兵王錫

江副將張連升及其子鵬舉金華副將朱

南大寶山頭在慈谿縣死尤酷死雖酷功實多從死之士卒其名

亦不磨所惜張總戎朝發功罪猶殊科同時有直筆若文若

詩歌謝君一一勤搜羅天知謝君劇好事先遣收藏棘闈字

乙未鄉試厚菴從事外簾姚公異時攝職之永嘉突兀堂前

見題識萬公雲飛楹聯在瑞安副戎署厚完人遺墨得合并

力透紙背想忠義更教華蓋謁雙忠陳忠毅公丹赤馬忠勤

馬公之姪穎姿家人張亦賢公瑛同死耿精忠之難

亦死焉有祠在温州華蓋山弔古傷今同一致同官率錢新

崇祠碑傳遺文急編次先人紀錄有思賢厚菴之先橫山先

鄒公事記宋道鄉續以景忠思忠可連類開緘字字光芒寒讀之使

我慘不歡粵西方探赤白丸願以此激壯士肝嗚呼小醜勿

莫衍卽日蕩平罷征戰安良除暴賴郡縣豈無治行稱最善  
請君更補循吏傳

述懷三首

六歲入小學早受六經義父母望我心我能說一二日讀聖  
賢書略識聖賢志我家忠孝家所事忠孝事漢唐宋諸儒闡  
發無二致因循廿年來曾未一經治開卷不敢讀一字一行  
淚

近者百年內遠者千載餘古人與今人遠近常相須相須不  
相待味道留其腴流傳在六籍所以舉一隅其中有疑義還  
望今人祛讀書守章句所得僅皮膚結想文字外悠然見古  
初

丈夫不凍餒此外何營營還讀古文字庶遠俗性情素心六



七人相與期有成所以相告戒不在軒冕榮父母不我待餘  
生敢自輕默念父母教還感師友誠庶免一朝患敢希干載  
名

崇明老人詩并序

讀陸清獻公崇明老人記演爲歌謠取便婦孺口誦  
以俟大雅君子裁定焉

大哉

仁廟御宇萬物無不得其宜胚胎元氣方蒞茲

天子以孝治天下天下婦子皆熙熙延陵老人爾何人適丁  
其盛樂不可支少年鬻子以療飢分當生死長別離四子人  
奴亦蚩蚩那識古有南陔詩一朝乞身富家兒四間列肆如  
置棋其中一閒平不陂五日十日於此進壽卮老人九十九

妻生二歲遲百齡夫婦猶齊眉四子並立諸婦隨諸孫孫婦  
曾孫二十餘人輩行無參差伯子花米店米以治飯花裝衣  
有衣何必絹與絲箒中大布仲所治叔也醃臘堪朶頤季則  
南北雜貨羅紮案各出其有以供老人之所思老人飲博無  
不爲一串五十錢櫛中取錢錢不虧取錢入市任游嬉有時  
遣人錢密持以付博徒翁不知伴輸與翁翁持歸於戲四子  
之孝古難得四婦之孝古尤稀蚤餐午餐晚餐以次陳盤匱  
但願日日得見翁與姑一日不見心不怡於戲老人爾何人  
乃有上壽又得是子是婦樂不可支雲閒佳士王慶孫親見  
其事口述之當湖夫子史筆垂康熙二十二年十月旣望時  
孤兒讀之涕漣漉此事足沁人心脾演以韻語譜入笙詩吹  
時惟道光十有三年

天子仁孝

聖母慈

到治上媿軒與義萬物各得其所如由儀願天下子事父母  
婦事舅姑皆如斯

聞衍石兄歸郡城下榻學山兄樂壽堂賦呈四首末篇  
兼懷雲壽兄武義

積雪明南窗獨坐憶遠道大河凍行舟何處賦春草忽傳一  
紙書開緘豁懷抱爲言卸裝初樂事田園好上堂拜世母慈  
顏幸未老家事咨長兄連牀度昏曉渴來犀角兒去日猶襁  
褁伊唔共燈火兒孫已聰了流光十五年忽忽同過鳥暫解  
京洛塵且食江鄉稻

江鄉迫歲儉物價日騰踊義田分無多況未雜荒茸幾家典

寒衣糴米滿斗甬一飽未終朝飢腸已雷動卽今眼中人何  
術救決踵歸裝萬卷書美味逾嘉種心計刪研桑遺經述鄭  
孔樂道久忘貧蕭然埽塵塢里黨歡相依出門無恹德願買  
田一雙耦耕傍先壠

耦耕恐難遂夢想澈上山山中有丙舍靜讀可閉關高峰九  
十九三面開煙鬢踏浪看山色我願充魚蠻卻因俗緣重尙  
阻仙梯攀我兄亦多累何日全家還偶來鷗共泛難與雲同  
閒不如且就我信宿茅三間相違動一紀鬢髮各已斑百里  
猶恨隔卽用衍石未得承歡顏

歡顏定可承相約十日後冷齋得春融清氣滿戶牖高談任  
縱橫參語可誰某家督秋水翁學山兄近自號秋水厚德壓曹偶同眠  
布被溫共聽寒潮吼可惜武城師講堂隔川阜待寫荆合圖

同居期白首

前年與學山凡同畫小影擬約雲壽衍石兩凡合四人寫一圖取樂順堂西偏荆合齋之義名

荆合

家風五百年宗族世敦厚夙夜念所生敬詘誓不苟安

排苜蓿盤徧酌屠蘇酒

范玉琨

字吾山嘉興人

五月二日厲徵君生日同人懸像于水北樓設祀即用

集中生日有感詩韻

不論成佛與生天鶴骨清癯尙宛然鴻博才華傳早歲煙雲  
供養過中年展圖曾預高樓宴設祭重尋老屋椽料得吟魂  
猶戀戀一庵涼抱荻花眠

錢梅

字載陽一字玉崖秀水人著鼓刀集

徐熊飛日玉崖生長屠門賣肉非溪橋下以好詩貧其  
家乃肩三竹筐置髻首羊胃雞跖鴨肫于中售諸市以  
自給篋下詩幅鱗次子嘗得其三幅皆  
七律渾雄俊健有杜樊川許丁卯餘意

曉發京口

一帆飛渡水天寬  
吳楚平分壯大觀  
瓜步煙籠芳樹曉  
海門日浴怒濤丹  
雲開古寺金山出  
江繞孤城鐵甕寒  
終古可憐天塹險  
六朝回首事漫漫

長江

滾滾洪濤勢莫窮  
蒼茫疑與斗牛通  
畫開南北江聲壯  
直貫西東地界雄  
芳草綠迷吳主寢  
亂山青繞楚王宮  
六朝無限興亡感  
覆雨翻雲一笑中

馬仲甫

原名駿字次山海鹽諸生著尚友堂詩集

資聖寺半竹閣雨夜次能白先生韻

東風吹雨滴簷鈴  
佛鼓無聲靜掩扃  
誰聽中宵話岑寂  
一燈如豆夢初醒

吳蘭森字菊裳石門諸生箸紉

蕉花館詩鈔津蹤集  
宋成熙曰君早歲能詩年甫逾冠遊粵東  
長路無聊旅居多鬱軀以咏歌發其羈愁

送客

送客老郵程揮鞭一騎行關山君獨往離別我傷情葉落千  
峯出天高一雁鳴柴門怕重啟愁對暮雲平

杜鵑

如助離人說憶家年年嗟血向天涯興亡故國真如夢紅紫  
漫山又發花千里客中春曷老三更枝上月初斜倦游我已  
思歸去聽爾應增兩鬢華

屈爲章字合貞號韜園平湖  
稟生著紫華舫詩鈔

石瀨山房詩話韜園家世華騰以不善治生中落勵志  
讀書豪邁自若也與亡兒金題交最厚結紫華舫詩會  
敦繁多  
知名士





和麗薄太清朝朝吹綫鳳凰聲豈知綫索由人難自主左之  
右之迭變更忽然中斷如懸旌隨風東西填溝坑吁嗟風箏  
弓自古居高居滿鮮有成

張應鼎

字同甫歸安廩生  
著青藜精舍詩鈔

張應昌序畧先兄同甫公博學能詩文卒年僅二十一  
九所著有詠兩漢列傳詩三卷讀史論略補一卷

富春舟中寄懷仲甫二弟

一雁又分離河梁日暮時秋楓江上棹春草夢中詩陟屺瞻  
前路歸颿盼後期小園今夜月照影獨吹簾  
歸來纔幾月分屋住機雲席帽吾堪愧宵燈爾更勤茱萸花  
其插楊柳曲重聞羨煞脊令鳥雙飛共一羣

陳恩翔

字繩祖鄞人  
官四川典史

和黃幼山韻兼呈家兄芸閣

暝室不見日取明窺小窗盲夫覓鴉炙決拾隨甘逢譬諸夜  
郎侯誕語夸漢邦井蛙謗滄海未受洪波撞使之駕修梁脅  
折不可扛黃子與我兄今見國士雙頑石非礮材鏤刻強使  
縱範質賴康樂審音得文江騷壇兩詞客叨竊陪節幢征帆  
卸山郭乍喜成徒杠官廚啟冬釀合座同玉缸醉後興倍豪  
繇宵剔銀缸詩書飽閒暇頓覺頤頷庵心希班門弄氣不聊  
城降枯腸窘搜索舊疾發痔肛寫方出庸師百藥彌雜哢何  
如守禪寂遠法居士龐好勝不自抑客氣盈軀腔如以一拳  
石爭峙對崆峒千里蠅附尾百尋蟻緣樁從知瀛海波不辭  
細流淙

陳

曙

字赤霞號東生慈谿諸生著陔南草堂學吟草

谿上詩輯東生與王愚溪同時俱遊  
幕浙東西並好爲詩東生風骨尤高

鄭大簡香出示竹垞太史贈其先人寒村先生墨蹟詩

即用曝書亭校本韻題後

十年兄事得袁絲爲展青緇話舊時幾輩詞場爭跌宕一編

法物重畱貽古懷如晤思求友大雅誰傳自得師珍重文章

靈契在擘牋新校竹垞詩

學使阮芸臺先生屬簡香校竹垞小紀放云

息園訪鄭簡香兼示葉愛三

緩棹泊城東裴裊舊游地最憶辟疆園叩門隨月至未面先  
聞聲驚喜各把臂良晤愜所懷往事重省記雅集續題襟尊  
酒勞招致一闋賞花歌花酣人亦醉謀樂且未央蹤跡忽遷  
異飄風逐停雲會晤安可冀珍茲半夕談不盡兩年思紛披  
圖史香峭蒨竹柏翠服古待用身是焉足棲寄晨夕互討論  
渺余時悠企月落挂帆行低枕不成寐

蕙江曉泛寄懷葉易庵

侵曉出城闔江光一棹新淡煙村外樹殘月鏡中人之子邈  
秋水相思滿白蘋微波如可託遠水碧粼粼

李聯奎

字小愚山陰貢生

孫垓柳橋感舊截句自序曰柳橋曲池陳高士別墅梁  
文定公購為第水木幽勝北為李明經柳塘小圃鱗垣  
紙閣薺花竹幾與曲池埒李截句云云冲遠可想三  
十年來前塵恍若隔世占此用志盛衰存沒之感

截句

小圃幽棲一畝餘半牆花影澹而疏柳橋日晚無人過古柳  
先生坐看魚

黃源屋

字左泉號克齋徵謀子餘姚人著鷄枝軒贖稿

宗稷辰序略源屋天姿超邁博覽載籍弱冠讀程朱書  
即厭棄科舉學慨然有志於求道朝夕研求太極圖說  
若有神契性耽吟詠短幅長篇古音古節饒有飄然不  
羣之概襍失怙鞠於祖母與人言輒哽咽身素羸善

病年二十九卒未娶無子遺稿散佚第炳屋為搜集行世

隨家大人出南門外

秋郊霽色似初春拂拂商飆最可人一水平流舟若葉兩城壁立屋如鱗家家橘柚經霜老處處楓蘋帶日新常對殘書無暇暑偶隨杖履作閒身

張景山 字松居黃巖諸生

縣志景山副將廷獻子生三歲父母相繼卒兄某官守備年未三十亦卒嫂項氏守志不嫁景山幼育於嫂專嫂如母性豪放善畫興之所至凡松竹梧桐荷菊無不精妙寫蘭尤有名孤高簡傲如其為人

新晴曉望

好景新晴後尤宜清曉閒渚煙空木杪梅雨歇江灣紅上三竿日青來四面山吟眸隨處豁野興自閒閒

方應麟 字元鳳號玉海金華諸生箬滌松閒鎖二卷

張作楠傳略玉海父志衡師事杭大宗攜道古堂集歸  
 玉海方少閱至陸德明為論語孝經孟子撰音之語問  
 曰經典釋文有孟子耶志衡無以應又閱三國志補註  
 見諸葛亮傳引借風事復問曰稗官可證史耶志衡又  
 無以應他日譙客宜樓庖人進烏賊魚客疑名不雅玉  
 海侍側曰吳都賦鳥賊擁劍三都亦不雅耶客慚志衡  
 叱之退歎曰是兒機鋒太俊非載福器也時邑人曹琦  
 圃以人師稱命玉海從游業日進議論風生佐以書卷  
 滑稽無窮常屈其座人玉海性高曠耽詩酒淡於進取  
 弱冠與方水部元鵬戴庶常聰以詩受知相國大興朱  
 公二人先後成進士玉海獨以諸生終年三十七卒余  
 游雙龍內洞讀玉海題詩險破鬼膽足與山石並壽境  
 奇人奇宜其詩亦奇又聞玉海善事親卒之日猶斑衣  
 博老母一笑退而坐化惜吾向者僅以詩人酒人目之  
 也

擬相逢行

人心嶮峻如太行我欲平之愚公叵人心深沈如海水我欲  
 填之精衛死懷茲義憤三千秋安得巨靈與夸父掌擘太行  
 山渴飲海水無涓流險阻削平機械絕康莊萬里聲相求道

逢阮步兵聞言獨搖手君若不負人人其敢君負海客無心  
可狎鷗莫怨相知不忠厚

鹿田奇石歌

太行王屋高刺天天遣夸娥二子擔去滄海邊奇石萬千忽  
解散半空飛墮長山之鹿田嶙峋兀特荒草裏入眼驚歎觀  
止矣仄如壁立平掌撐巖岫亭臺次第呈昂如虎豹瘦如鹿  
或則彭亨脹豕腹列星墮地癡雲飛千態萬狀看不足更有  
玲瓏雙石堆是耶非耶點將臺俗稱點將臺日銷月鑠風雨蝕顏  
色蒼碧生莓苔何物山靈肆狡獪拉攏礪碾足神怪藉令子  
久過應憐縱使米顛見亦拜須臾煙霧交模胡長風瀕洞爭  
号呼沙飛石走雙目眩恍惚置我八陣圖斯遊奇絕樂復樂  
豪情始踐名山約何時重上最高峰手招白雲騎鸞鶴

張萬傑

字雋羣分水巖貢官上虞訓導

袁孝子詩

扶輿靈淑氣磅礪為忠孝居常行獨庸處變節彌耀卓哉袁  
孝子救母氣何浩騰身烈燄中往返頭額燎天地胥震動鬼  
神為默導畢竟負母出成仁火可蹈求忠於孝門一貫無二  
道之子如立朝龍比應同調我展芸編讀雪涕還憑弔凜凜  
生氣存千秋應廟貌

蔡

敏

字遜谷瑞安諸生著半醒軒詩稿

快軒詩則遜谷性脫畧不治生產惟詠詩是務每夜坐必達旦方寢傍午而興嘗有句云耕桑樹畜仗荆妻家政無須待我齊只好燈前書一卷擁爐閑坐管雞啼

春晴

曉起春花紅一鳥鳴前林晴旭亦既佳閒庭坐披襟和風忽



然至散步發微吟隨意遲遐矚明媚生遙岑沿溪任孤往流  
泉有清音行行得真趣曠然古人心

溪橋候月

碧天雨洗淨厯厯布列宿好風入戶來微涼生衣袖忽然思  
良伴明月與故舊因之策孤杖獨坐溪橋候隔溪樹影落月  
已在遠岫隨步踏流輝地白旋疑晝伊人殊渺然露溼芒鞋  
透

初秋雜興

連日天晴明纖雲淨如指回頭語僮僕爲我掃閒階今宵此  
庭戶當有佳客來可與其琴榻可與同酒杯坐對雖無語清  
氣襲人懷僮僕驚問我僻壤誰同儕得非松頂月過牆與翁  
偕予亦所然笑可見知詼諧月出僮起舞予亦忘形骸

采蓮詞四首

蓮花濯濯弄晴波十里長歌接短歌誰惜秋來滿房子西風  
冷落苦心多

同行爭折水中央妾猶遲遲意自商不願花如郎面好願郎  
情比藕絲長

色迷香醉亂如麻綠戰紅搖到日斜遠近隨人黃蛺蝶不知  
爲妾爲蓮花

姊妹同舟各自求問誰曾折好花不世閒易合非嘉種莫怪  
蓮難遇並頭

雨晴

檐雨聲初罷村煙半雜雲林風忽吹散山鳥下紛紛花徑夾  
流水野田浮夕曛東皋一以眺相賞意交欣

訪山寺

松風吹翠滴衣裳遠磴無人一鳥翔石罅引流爭絕壁海雲  
扶雨犯驕陽身隨筇杖凌巖險佛與山僧共竹涼薄晚蟬聲  
聽不斷歸途吟興助清狂

湯

春

字笑山錢塘人嘉慶戊辰舉人官  
江山教諭著可自怡齋詩偶存

臨平石鼓歌

古來偉器難湮沒震赫人寔音激越如何長向水邊埋匿迹  
銷聲沮鬱勃錢塘治北臨平岸山勢崔嵬水滂沱一朝石裂  
土敲傾中有鼓兮出突兀相傳得自典午初秦歟漢歟何代  
物摩挲更無字畫鐫峻嶒不使精靈汨路人持槌屢擊之中  
孕噌吰闕不發世無博識張茂先桐魚誰叩逢逢徹我聞十  
鼓出鳳翔太學森森兩行列禹鼎湯盤寶貴同韓蘇大筆皆

卓絕成周法物歷朝珍此鼓諒難與比烈或者泗濱之磬彭  
蠡鐘同奏鈞天聲擊節

孫同元

字雨人仁和人嘉慶戊辰舉人官永嘉教諭

東軒吟社同人小傳兩人為侍御志祖之子守經師家  
法官永嘉日恆以經義提唱諸生多所造就與長樂梁  
侍郎章鉅善唱和最夥著有今韻三辨弟子職注六韜  
佚文永嘉聞見錄學福軒筆記各如千卷家富收藏有  
古劍一劍室乃以蜈蚣巨蛇  
為之百足之痕隱約可辨

家藏宮僚雅集酒器邀同人作歌

銀槎舊藏北海家前人歌詠爭相誇吾家亦有銀鑿落迥異  
銀工碧山作十杯約計重五鍔流傳卻在康熙間同僚宴集  
徵風雅一時並屬宮坊官梅花式樣頗精好以大覆小累成  
套烏絲細界陶鑄良惜未名題某匠造大戶首推文正公湯斌  
小戶乃為漁洋翁王士禛更有沈荃郭棻與王宏耿介田喜張霽

英李錄朱阜居其中何姓何名何邦貫杯底雕鐫筆畫燦想

見當筵觴政嚴惟酒無量不及亂昔年吾祖讌嘉賓把杯句

妙推汪倫迨後吾父邀客飲春園舅氏詩猶新至今往事皆

陳迹猶幸摩挲存口澤何當洗滌用鹽梅借此光華照几席

上已後一日錢蕙窗師曾招補禊事偕同人訪玉津園

遺址

歡會逢春興倍酣高人屋況近江潭隔朝禊事從容補南宋

荒基次第探自昔颺言誇侍燕至今角藝尙停驂景鐘遺器

天留在說與桃花總不諳

李紹城字築初號淡畦仁和人嘉慶戊辰舉人箸淡

畦吟草知北游草碧棲山房集寓蘇小草  
蔣焯傳畧澹畦恂恂循謹與施君紹武同以詩名紹武

詩冰茹雪食瑀碎月總澹畦則鏤金錯采雅近晚唐工  
駢體文淵  
博沈麗

杭郡詩續輯淡畦行事有繩尺不濡染儂薄之俗與施  
紹武同受業于朱青湖先生所爲駢體文尤博麗爲時  
所矜

讀鄭湛若赤雅

外紀標職方卮言紛鑿空譬談四部洲鄒衍實作俑持此擬  
山經大笑腹先捧鄭生南海珠韜光落猗種花鬢雲鞞孃弓  
刀森葉拱雖無阿禡歌蘆唱迭相踵地荒日月偏峒花紅總  
總目驗神儻悅牒怪筆成豕遄歸邁陽九抱琴入頰洞音化  
水仙彈名兼文字重匪賦亡是公拘儒豁心孔誰和阮亭詩  
旁招酬馬潼

明張忠烈公手書睢陽聞笛詩墨蹟

睢陽城下援兵絕城頭笛聲夜鳴咽軍中聞笛氣慷慨吟成  
五字皆沾血前明張公竄海甸手提孤軍猶轉戰時危懷古

更堪傷磨盾餘閒親筆硯嗚呼殺身成仁同一死千載忠魂  
竟相似君不聞金陵馬阮工填詞白綾小冊寫烏絲家山慣  
唱無愁曲長笛雖悲總不知

城東雜憶詩

蕭閒堂下老倪迂問字門庭載酒車耐守青壇十七葉孫枝

摹隸校殘書

倪嘉樹一擊

飯顆山頭太瘦生口談今古筆縱橫自從阿非埋銘後冷坐

寒齋夢亦清

曹仙釋棟

歎息秋堂冷化雲印人詩畫尙思君假年若過王濛壽應免

重臺學右軍

陳秋堂豫鍾

力疾扶牀醉六經卅年清瘦鶴梳翎童烏也侍修文去生世

何人眼最青

王木齋述曾

沈之瓊

號寶樹秀水人嘉慶戊辰舉人著雲暢樓詩稿

孫灝曰孝廉與朱少谷舅氏為總角交詩格雅近香山

孟縣

膝壤連鄒嶧遺風滌發棠異端距楊墨吾道老齊梁檜樹參天迴靈泉出地香尼山誰可嗣萬古此烝嘗

作畫三首

楊无咎灑已全淪貌出荒寒景未真懶學元章圖萬玉兩三花自十分春

亂隨細菊插籬根竟體芳敷品自尊恍夢鷗波亭上坐夕陽紅名寫趙王孫

可是無心作畫師風梢露葉儘參差年來頓頓燒豬肉最憶園林新筍時



識賈衡石洪及弟蘭皋漢於孝友堂出詩稿索題

賈生正年少逸氣著文章提槩傾流輩傳薪得老蒼謂徐機

雲吳下陸羲獻會稽王乃尊肅軒先生家學饒風矩懷君孝友堂

陳履亨字春萼海鹽人嘉慶戊辰舉人

官臨安訓導著挹翠樓詩草  
錢泰吉日李春湖學使以憑軒詠堯老命題士無知者  
君時監場為誦全篇皆驚服此在君不足異記之以為  
熟精之證

渡邳河

車馬轟闐集邳州競渡河征袍春露溼行篋曉霜多久箸圯

橋專長流汴泗波穀城何處望樹色綠平阿

陸坊字禮約號野橋平湖人嘉慶戊辰舉人官永康訓導著草心亭詩鈔

徐熊飛序畧君幼承家學以詩名於世筆耕事母能盡  
潔白養其詩思深體峻凡所撰著苦心孤詣久之而後  
成

閒居寫懷

初雷籟龍驚森森露頭角老饕不解事取配花豬肉瘦損得  
毋愁食之差免俗此君風味古原不諧口腹所宜幽居人坐  
對空山曲一雨一番晴千竿萬竿綠

苜蓿雖小草萬里來流沙天馬之所需厥種亦孔嘉孤根凍  
不死爛漫舒春華彼蒼眷貞性野趣供田家倚生者何類較  
此應咨嗟麻中有弱葛棘中有懸瓜

麥苗剝剝齊昨夜前谿雨天功未可貪負耜循園圃去草先  
去蔓弗使紛然吐種蔬須種韭根葉長團聚家人知我心隔  
牖殷勤語不見漸遠鳴飛鳴亦辛苦

營營市朝客如卉爭春陽正月萌芽動二月參差香三月盛  
難繼零落紛路旁所以蘇耽鶴高舉隨風翔疇能玩物化相

與遵微行今日挑菜地昔時鬪雞場

客從滇南來投我書一紙中有故人心開緘淚不止相別踰  
十年相思隔萬里當時送行人一半化爲鬼人何輕去鄉自  
有舟車始舟車無定時紅塵與流水

蒼鷹化爲鳩騷人惡佻巧當其搏擊初颯爽驚凡鳥園中拒  
霜花漸寒色漸好羞與眾雷同開落惟春曉人誰不愛名晚  
節鮮能保在山爲遠志出山爲小草

魚戲不見水鳥飛不見雲吾思華胥國戶戶南風薰曠懷游  
太初殊類皆同羣忠孝名未立而何競功勳死生情未擾而  
何嬰垢氛解衣與推食薄俗方云云

櫟釜謠

鄰人有不恤其弟者作此諷之

櫟釜聲傷弟情出門走逢阿兄兄執弟手弟安得住室中有

嫂能令兄喜令兄怒兄心嫂心兄身親身兄不弟恤熒熒鮮  
民秋風起庭樹飛尺布斗粟春縫奚施啗瓜翻瓜車煮豆燃  
豆其外人諒難知請兄日三思

饑民歎

去年稻熟不滿租今春春盡猶追逋豆落爲萁麥枯死滿箔  
紅蠶僵不起家家竈突寒無煙斗米五百青銅錢况復乖龍  
誤行雨插秧見水不見土告荒絡繹官怒嗔昨已將符下富  
民富民安得藏私粟須助貧民一月粥一月未盈報有秋吏  
胥轟醉倡家樓

報災謠

雨師不管鞭陰石下田焦卷高田赤府檄如聞委吏胥被災  
分別登災冊縣前接迹疲氓來三百錢報一畝災無錢痛哭

仍空回君不見農日瘠吏日飽是災非災恣顛倒更望來年

旱尤好

徐保字

字沅齡號阮鄰歸安人嘉慶戊辰舉

柳隱叢談沅齡世居青鎮庭有玉蘭數百年物榜其堂  
日抱碧嘗隨那繹堂尚書籌戎西疆其詩得伊涼之氣  
冷廬雜識沅齡以名孝廉出幸秦中大吏重之擢階州  
牧解組歸林下優游娛情詩酒尤長於七言律句如秋  
感云百蟲愁語古今感一笛涼生天地秋由汜水抵鞏  
縣云陰谷雙輪雷入地頽崖一線井窺天水行云樹顛  
野戍雲攔路山墟人家石築門初冬石觜山旅夜云十  
月苦寒邊地早一樽清話故人同游拙政園云四圍花  
澹鷗眠艇一徑松陰鶴候門寄懷吟谷叔璩章云九派  
江流歸棹遠一春柳色小樓多清華俊逸不愧作者

月夜古山探梅

踏月月如雪梅花樹樹妍滿林香忽斷獨立意蒼然溪凍不  
流水山空欲化煙寥寥孤雁影飛向寺門前

靈石道中

關古泉聲冷城頽樹色蒼馬蹏穿絕欄人面落新霜李靖祠  
空閉韓侯嶺未荒搖鞭訪靈石幽壑正朝陽

僕子耕參軍招詣華嚴禪室待月

叢樹蕭森紺宇開梵音風度妙蓮臺雲隨閒吏無心出月似  
佳人有約來讀曲花前澆苦茗題詩石上點秋苔菱塘絕妙  
幽樓地輪與梅林老辨才

山行

村郊暢好卸行旃門繚幽花屋架藤樹蔭涼眠茄鼓隸溪坳  
雨立打包僧山因愛看詩腸飽酒爲多澆病肺增說到鄉愁  
祛未得煙波隔戶夢漁翁

江船雜咏

江迴灘繞百年灣幾日離腸九曲寬一棹畫眉聲裏過客愁

多似富春山

謝文節公琴歌

一彈六陵風雨聲激號再彈忽作匡山之海濤三彈四彈竹  
石裂黃雲捲入燕臺高吁嗟謝文節萬里孤魂一腔血身可  
爲趙氏亡琴不與宋家滅魚龍貓虎運不昌七條瘦玉調清  
商潮陽建陽同一哭思歸誰唱南朝曲哀哉丞相琴青原山  
下之苦心哀哉侍郎琴閔忠寺裏之悲音白雁謠朱鳥吟板  
橋道冬青林蒼蒼涼涼併向琴間出琴聲鬼聲辨不得成仁  
取義各千秋同抱瑤琴兩奇絕壞漆淒涼桐梓材團湖唐石  
至今哀陽關恍送水雲去晞髮還聞皋羽來

題謝皋羽晞髮集後

三日江潮一塊肉天荒地老詩人哭一哭候潮山再哭嚴陵

臺手持竹如意朱鳥魂歸來酌酒北向哭聲震竹石欲裂天  
門開十年淮上禳雲黑君王罷宴芙蓉闕鏡歌一曲難再聞  
眞主北來入中國文山勤王戰潮陽土兵數百死堂堂五坡  
未執中原復安知參軍不與日月同爭光走歸句越願爲汐  
池榭山嵐風景別芳草圖中愁美人白雲原裏眠逋客四明  
碧雞山崔嵬仙乎仙乎非凡材爲唱南唐奉使曲慟哭不得  
天顏迴嗚呼申胥九頓首賈誼六歎息公旣不能長號徹帝  
關哭動虛危復何惜九鎖山人天下士一別杜鵑君已死死  
日不歸田橫島生時乃隱方千里大宋遺民泣帝都紅羊故  
劫沒寒蕪空將三慟西臺淚灑向東坡夜雨圖

章超文

字又超號滄洲歸安人嘉慶戊辰舉人揀選知縣  
著滄洲詩集二卷南屏唱和集一卷積川集一卷

轆轤篇



輓轡并轉花影遲小院春深花落時美人慙花花不語獨立  
花前淚如雨遠道懷人思悄然東望望春春可憐夢裏隨君  
君不覺年年怯奏鴛鴦絃花開花落催春色一曲芳悰傳不  
得銀牀水滿夜無聲月下惟聞花歎息

題徐沅舫同年青山翠羽圖時有悼亡之感

最是神傷得句難青山忍向畫中看夢隨翠羽魂飛苦香詠  
梅花韻落寒雲想衣裳虛夜月水如環佩逝驚湍華年錦瑟  
絃絃促抱影空房憶舊歡

何美濬

字次封鄞人嘉慶戊辰舉人官秀水教諭

題陳越舟明府月湖秋泛圖

不見南湖勝秋風又二年賀公祠畔月史相宅中蓮橋想懂

懂過

湖心兩橋古名

鏡應節節鮮

吾鄉秋社最勝

君家擅清福占得

不波船

陸春明先生讀  
善處名不波航

分明洲島在太史費評研

全謝山先生有  
十洲三島考

古瓦餘臺榭漁舟

雜井廬遠懷鶯脰廢

城西廣德湖一名鶯脰  
曾子固有記宋廢

新見水喉穿以城

東三喉為宜洩久湮錢邑侯竹初尋得二喉歲  
甲子子同鄉前驛訪得水喉在東渡門之內

太息吾鄉事

伊誰其仔肩

汪能肅

字雨人山陰人廣西籍嘉慶戊辰解元  
改歸原籍官嘉善教諭著韓齋詩文稿

府志能肅居官清介善鑿金石訓士務在德化博學好  
古著有魏塘人物攷休休壺山魏塘詩古文等集二十

一年卒於官窮不能歸遂葬嘉善  
多士思其遺教俾其孫入籍應試

黃安濤曰韓齋先生領解粵西後司諭吾邑講程朱之  
學師範卓然其所著述皆雄深雅健實足推倒一時亦

善草  
書

嘉興太守行

明成化初楊貞肅公知嘉興府剛廉孤介雖御史中貴亦莫

敢侮而時時召問父老為祛疾苦大起社學民間子弟教之

如父

解一

桐鄉張氏四凶久為民害公收捕論死張氏賄當路

以無原告為解公曰請即以知府為原告當路語塞竟除其

害

解二

有富民厭其壻貧請離婚公詭曰爾出金二百聽別聯

姻既具則曰以此付爾壻爾壻不貧令即日成婚

解三

浙東大

旱公移羨餘濟振事急不及請督儲督儲欲置公於議甫展

贖風雷交至督儲駭然遂寢其事

解四

又公不收夏稅以郡餘

米補之僉憲欲摭以為過取公舊贖驗之贖忽聯翩騰空有

羣鴉爭噪攫之隨風破敗遂飄散無遺

解五

九載而去民莫不

號泣以思送行數千人眾口一詞願留公一物以慰民思公

與以青紗衣民藏諸髹櫝置諸三賢祠

解六

公之有祠自正德

迄今歲久傾圮莫慰民心嘉興程訓導倡議修葺增高益傑

以享以祀以勸來者勉嗣公徽音七解

古琴

時手即能弄古音終不全若為存太始最好是無絃獨夜空  
山外驚濤大海邊此時吾與汝默默待成連

冬夜讀書偶作

廊廟山林兩不成老來有味只孤檠書多要在生前讀名盛  
還防死後評半夜高窗賒月色滿庭大木戰風聲寸心五岳  
時時起欲向窮途一請纓

周辰謨

原名成號芸舫山陰人嘉慶戊辰舉人官安吉教諭

春日訪友不遇

出游無定日閒即到君家空倚環門柳徒開繞砌花故人應  
采藥童稚漫呼茶坐久思留句其如星漢斜

李師泌 字繼芳山陰人嘉慶戊辰舉人官青田訓導

青田縣志師泌以道光九年任開館課士待諸生如家人嚴而有恩才而貧者則分俸賜之二十五年卒于官杜煦曰芋畦未可鐸時門下之盛甲於越中者二十餘年教人以行誼為先教文藝以經術為本早失怙恃孝於祖母歿廬墓次哭而咯血友商葬亭嘉言卒後遺七齡幼女取養之王自超墓在瓜衍邨圯毀修整之餘高義率類此

六十自壽

蚤年文史足風流不信生平志未酬官冷祇餘人問字山深  
常訝樹鳴秋妻孥投老添新累朋輩相思夢舊遊從此壯懷  
消欲盡霜華日向鏡中稠

陳鴻達 字九巖會稽人嘉慶戊辰舉人官廣東大洲場大使著囊翠樓詩稿

股堰

里正築塘功屢圯縣官鞭撲慘將死羣言怪物居作殃蕭邑

田疇盡淹水其妻痛夫哭吞聲剖股禱江殉以身堰若能成  
身可死此身卽死夫獲生巾幗立志堅如城削骨使同石骨  
撐冥頑那不感其誠江濤嗚咽聞悲鳴迄今西陵成樂土潮  
汐不衝盡安堵追想當年築堰時一臂力援千萬戶幽光奕  
奕誰星辰合向江頭薦藻蘋寄語騰驤雲路客致身無負股  
肱臣

蕺山書院偕同人紀念臺先生

崛起蕺山客流風一代存學非陳說盡社以證人尊直達陽  
明奧旁通石簣門瓣香千載下蘋藻薦芳樽

陸雲樞

字砥中蕭山人嘉慶戊辰舉人官慈谿教諭

辛丑四月初夏遣興和賴芷泉明府

十二年前秉鐸初一齋冷落且安予龍頭自昔原無分鼠膽

於今更不如越客舟來求老酒俗呼越釀為老酒甬江閣到借奇書

連番暘雨逢時若所望收成喜有餘

四明烽火倏經年近海流民最可憐何處炊煙留麥飯為言

滄海復桑田重洋幸息干尋浪宦局真如一點煙我坐寒甌

雖耐久邇來興味更蕭然

句章城邑異彈丸帶海襟山信壯觀南眺管亭朝旭麗西臨

鵬塔夕風寒逋逃豈必追窮寇修葺何須待冷官聞說撫綏

期善後一枝棲息也相安

邢照字章亮號海珊嶼人嘉慶戊辰舉人官歸安訓導

### 太白山

西望太白何磅礴唐上游高踞森開張跨越三邑作屏障拱揖

四明羞雁行峯巒出沒數不盡倏忽萬狀搖滉茫風雨蛟龍

走東海暄晴宮闕凌青蒼丹井涌泉品第一由來味美如雪  
霜仙女有盤旱不竭七夕往往聞珮璫更有天門與天柱吐  
雲含景靈物藏赤瓊彩雞互飛舞蟠桃仙茗交芬芳憶昔廣  
信此修道九還丹成乘雲翔稚川箸書百十六亦有祠宇留  
山陽恨我不及見褚孔猶幸居傍高人鄉太平舊館劫灰盡  
亭軒彷彿近道場藤蘿斷碣覓不得風流自共山俱長閒雲  
野鶴各有志安能株守空荒莊天台一萬八千丈夢魂飛度  
恣徜徉會稽禹穴親探徧陽明伐鼓驚磅礴爲登鹿苑攜酒  
榼復覽畫圖停風檣靈竒洵可增達識况復此山峙廬旁會  
須著屐上絕頂手挽銀漢湔詩腸

萬松隄

太平東畔有古隄欲斷不斷隨柅谿老松錯立不知數作勢



偃蹇蟠虹霓節是冰霜葉風雨遙山氣應蒼龍舞靈秀何論  
鄭家七支離直壓秦封五頗聞父老說榮枯此隄昔日通行  
梓谿流遷徙向南去相將荷鍤開荒蕪一簣功成沙日積高  
者成隄下阡陌至今隱隱存劫灰臨厓蔥鬱失寒碧滄桑變  
幻本如斯漫道今時異昔時彭殤壽夭齊道眼坐閱千歲松  
甯奇卽今翠蓋蔭林麓和嶠森森李謾謾興來挈伴一登臨  
腳下龜蛇若車軸

劉

佳

字德甫號眉士江山人嘉慶戊辰舉人官

徐庚瑞序畧余與眉士誼若弟昆道光甲子出宰奉賢  
丁亥移溧水偕何君澹初訪之肯書一聯贈別日勉爲  
良吏斯民幸問到廉聲稚子知葢紀實也越十年告歸  
僑寓吳下門庭蕭寂惟有藏書簪瞻雲錄一卷漢唐地  
理志合編二卷搜圖補註一卷格致小錄四卷

梵天寺觀吳越所建經幢

荒山空夕陽衰草少人迹  
峩峩蓮花幢對立寺門白  
殘字宛分明建年尊乾德  
天下大元帥臣俶所奉職  
是時宋開基榻旁無臥客  
南唐旣歸誠北漢亦褫魄  
俶也念區區螳臂料難敵  
納土豈初心賂金有深惕  
投命飯空王欲乞護持力  
金塔與石幢勞費不遑惜  
我來弔遺址深副平生癖  
武林闕唐碑最古惟茲石  
再拜謝伽藍回首暝煙碧  
寺中伽藍神爲東坡先生題詩有但聞煙外鐘不見煙中寺云云

華嚴寶塔圖 并序

明嘉靖閒有許德字虞山者  
夫婦同書華嚴經作寶塔圖  
凡十兆九萬四十三字字細  
如蟻閱十三年乃成今藏天  
甯寺中德寬上人出以示客  
乃作此詩

四千六百有餘日晨窗對試  
銀鉤筆華嚴樓閣指端成信  
有

人閒眞願力許家居士神仙孫早歲香燈淨六根生當嘉靖  
昇平日夫婦同心戴佛恩發願寫經宏聖教蠶頭出手皆精  
妙浮圖突兀十三層一層一歲毫尖造木魚聲裏度年華尖  
合全無一筆差絕勝函中繙貝葉那同幃上繡蓮花吾聞趙  
松雪寫經書最工然出一手耳未與仲姬同又聞彩鸞夫婦  
皆登仙一日能書百幅箋要不寫經惟寫韻至今寸絹罕流  
傳豈若君家善女人與善男子功德懃修乃如此珠網西天  
總渺茫金塗南國徒華侈當日生天自一家如今合璧稱雙  
美不惹蛛絲不燕泥梅檀供養儼支提便同白傅香山集龍  
象諸天好護持

血衣行 并序

明嘉靖中吾鄉徐東溪給諫嘗抗疏救貴溪相國受

廷杖家遺血衣一襲其族裔少溪

庚瑞

屬余兄弟賦

詩

仗馬一鳴天動色大呼伏闕請誅賊滿腔熱血爲誰傾  
灑向君前死亦得肅皇高拱分宜驕京攸勢燄傾中朝  
閣臣朝衣赴東市貴溪冤氣何能消吾鄉給諫人中傑  
救章夜半達天闕午門朝開赤棒來一片淋漓飛紫血  
元老思將百口籍微臣自有渾身鐵臣雖瀝血未剖心  
此中耿耿向誰說解組歸來關小園自焚諫草不開門  
殿中補袞虛心事屏後牽裾只夢痕惟有故衣血未浣  
年年被服總君恩依然白髮思明主願把丹心教子孫  
我行曾到東溪宅舊篋雲初猶護惜可憐一樣物傳家  
不及魏徵笏三尺北闕傷心化寶衣西風有淚流銅狄  
衣冠髣髴魂歸來烈血千年不化碧

橫塘曲

橫塘三月綠楊新  
畫舫朝朝送遠人  
女兒生小顏如玉  
珠串歌喉腰一束  
虬鬚大腹襄陽買  
十萬纏頭買歌舞  
金釵半醉斂微霞  
玉撥輕挑聲似雨  
獨有佳人在空谷  
冰雪亭亭倚修竹  
金刀翦素夜縫裳  
翠袖牽蘿秋補屋  
君不見女牀之山雙棲禽  
生死不離珠樹林  
裙布荆釵貧亦樂  
年年一曲白頭吟

吳宮曲

紅衣半落碧釵墜  
露溼芙蓉纖手脆  
料得君王愛並頭  
含情只采鴛鴦蒂  
歸來換取柘枝裝  
歌舞宮中樂未央  
醉後烏嚙雙闕月  
夢中大吠五更霜  
管弦聲歇風塵闔  
回首東門事悽慘  
一代蛾眉愛捧心  
十年烏嚙甘膽廢  
水長洲淺不波西  
風麋鹿故臺多  
吳娘不解興亡恨  
猶唱當年白苧歌

壬申九日

西風吹客上層臺，磊落千秋作賦才。  
野寺黃花聯馬出，平原白草放鷹來。  
墓門人拜松楸去，山砦兒收橡栗回。  
雲物清秋多變滅，側身吟眺一徘徊。

百感茫茫散薜蘿，閉門冠蓋少經過。  
病勞長者扶持數，貧賴良朋慰藉多。  
聊以簪萸酬令節，誰能送酒佐清哦。  
題詩說與催租吏，此興年來健不磨。

詠史

紬被頻年倦放衙，鷄鳴誰挽鄧侯車。  
似聞陶母能封鮓，不道潘郎更愛花。  
飲水何妨門是市，點金容有術傳家。  
閒緝青史循良傳，廉吏難爲一歎嗟。

過太平寺晤見月上人

兩年飄泊損朱顏  
人海抽身迹蹇還  
入世可知才亦累  
幾生修到佛同閒  
聽經鶴靜長依塔  
洗鉢泉清只在山  
掃地打鐘吾亦慣  
白頭可許傍禪關

卽事

歸後相如四壁虛  
益中苦乏隔宵儲  
欲求丹竈休糧訣  
羞作朱門乞米書  
秔稻艱難悲鴈鴛  
江湖浩蕩媿樵漁  
平生與世關憂樂  
一飽區區計總疏

雜詩

長離翫九霄  
文采溢萬目  
夕棲龍門桐  
飢餐嶰嶰竹  
豈無羶與腥  
苟飽非所欲  
烏鷲爾何心  
乃攫道旁肉  
入腹能幾何  
營營實取辱  
我有青琅玕  
俯仰欣已足  
一鳴天下豐  
爾曹徒碌碌

南宋女教場

輦道荒涼草不春，尙餘瘦石峙嶙峋。  
君王不惜長城壞，翻學吳宮教美人。

瑞石山觀宋高宗書道德經石幢

殘字分明剔蘚青，銀鈎筆筆仿黃庭。  
先皇已誤林靈素，更續家風寫道經。

已占湖山作帝居，汴京陵廟付邱墟。  
可知十指如槌鈍，藝祖平生不善書。

常州

纔領徐州又兗州，蘭陵家世本通侯。  
射臍少主誠難輔，障面元臣亦可羞。  
禪代豈關朝野意，保全獨少子孫謀。  
蓮花步步終亡國，覆轍蒼梧九廟愁。



義兵一旅起襄陽東下樓船指建康三十年華真富貴一家子弟況文章順人應運名差正佞佛無功祚亦亡得失由吾何所憾臺城苦語總淒涼

虎步丹徒起義兵英雄草澤勢縱橫楚王破膽軍先遁晉帝甘心禪已成尙想旌旗開北府虛勞戈甲事西征葛燈麻拂徒留壁不值兒孫一笑聲

敵勢紛紛盡北回勤王一旅掘江來同仇婦女皆知義失勢郎君但乞哀誰使騎驢稱散士枉知臥虎是雄才紅袍一躍關天意千古濤聲激怒雷

自城東門至豐慶鄉一路居民多有以藝桃爲業者花時爛漫如錦爲駐馬賞玩久之

雲收不盡鱗鱗天溯流不斷灑灑泉人家三里復五里霏霏

颺出桃花煙花農種花不計年年種花當種田種田愁旱  
復愁水往往朝炊釜無米種花不是愛看花只願多花多結  
子綠陰五月子滿枝夕陽照樹紅離離樹頭採摘市頭賣得  
錢買米充吾飢吾家舊事猶堪溯曾與桃花有親故台洞初  
來悟夙緣元都再到成前度流水分明寫豔身紅霞生暈酒  
微醺明年此日重停馬定有桃花識使君

爲朱半塘

恭壽

明府題頻伽禮佛圖

并序

半塘妹字周氏未昏而周溺死妹守貞不嫁半塘爲  
作此圖

填海餘生怨若何招魂空唱定風波生憐玉樹偏搖落百尺  
亭亭讓女蘿

玉臺金翦委蛛塵經卷香燈結淨因奉了高堂還奉佛白頭

修得女兒身

團蒲無夢攪嘯鴉龍女前身悟法華想見木魚聲斷處香雲都作妙蓮花

阿兄史筆似扶風隻影霜天寫斷鴻不數徐家三妹子斷腸

哀誅擅江東

半塘自作記

朱

字翼補號堯裳江山人嘉慶戊辰舉人官山東昌邑知縣

春日書懷

醇風難得此邦人古樸衣冠總率真治簡思刪刑法志心慈又現宰官身三春景物留生意五載風波證夙因善政無多惟便俗累他父老說津津

曾

字層峯永嘉人嘉慶戊辰舉人

擬韓冬郎已涼詩元韻

銷金帳穩玳鉤垂鳳蠟燒殘青玉枝  
七彩被薰香百和碧紗  
窗外月明時

方成珪

字國憲號雪齋瑞安人嘉慶戊辰

舉人官甯波教授著珪研齋詩鈔

孫詒讓傳略成珪研精小學勤於校讐官奉所入悉以

購書儲藏數萬卷丹黃殆徧嘗謂古韻書之存者莫善

於集韻因據宋槧本及近時段玉裁嚴杰汪遠孫陳慶

鏞校正曹刻之誤復以方言說文廣雅經典釋文玉篇

廣韻諸書正宋槧及景祐元修之誤為集韻攷正十卷

吳縣吳鍾駿及定海黃式三敘其書深推其精博又以

晉干寶易注亡於北宋因攬摭佚文詳為疏釋為干氏

易注疏證二卷又謂流俗因字書承譌襲謬惟元李文仲

字鑑述古準今斟酌悉當因詳加攷釋為字鑑校注五

卷其他著述有韓集箋正十卷正宋廖瑩中世綵堂本  
韓愈集  
注之誤  
甘泉鄉人稿雪齋中年已後亦喜校書曾校昌黎集及  
呂氏讀詩記用力頗勤老尤矻矻不倦亦知交中所難  
也

朱壽保曰珪研齋詩後有自跋數行云道光壬午借端

兩浙輶軒續錄

卷二十五

方成珪

珪

於詩也久亦知詩不易言乎觀理不深不足以探旨趣也讀書不富則無以壯波瀾也非偏識乎古今之體裁則無以通其變化非靜調乎陰陽之氣脈則無以養其中和故人人言詩而詩之途寬亦人人言詩而詩之途窄鶴田固深於詩者而其言如此余深有味乎其言而有志未逮也觀其自跋而雪齋之詩可知矣

### 讀史

萬山出金鐵天地爲洪鑪鑄成給世用海內均轉輸戴髮含齒輩貢獻充帝都六合旣一統民富君與俱天子穆穆然口不言有無生財舍節儉詎有他良圖漢當文景盛頗饒軍國需及至武皇興糜耗非一途求仙寵方士開邊供芟芻後宮三千人被服羅與襦豈惟羅與襦玩弄皆金珠穴地取琥珀網海搜珊瑚文具及瑋瑁視之若泥塗坐此致彫傲度支常不敷後王踵起者籌畫彌可吁摸金署校尉銅臭爲司徒窮岩恣采礦比戶頻加租柰何天下主瑣屑爭錙銖至竟意外

財來去惟須臾譬如酌行潦何濟江海枯彼皆曰予智智者  
乃大愚孔僅桑宏羊聖世終就誅

悅耳非正聲悅目非正色古來明聖主宮闈垂內則警旦斯  
稱賢司晨卽越職奈何好內者妖冶日在側自矜溫柔鄉實  
召煩惱賦伐性持斧斤周身樹荆棘小者戕軀命大輒破家  
國禍水茫無涯橫決何由塞憶昔漢武帝英氣凌八極富貴  
所自有長生冀可得樂大竟尙主曼倩長侍直海上三神山  
縹緲不難卽服食不死藥便欲生羽翼回顧金屋中麗娟正  
靚飾氣將蘭共吹膚與玉同拭似聞攀龍髯道心由之息仙  
境固荒唐色界亦窘仄幸其秉雄姿駕馭尙有力不然豔妻  
煽火井恐頓熄後車不知戒乃爲燕燕惑昭陽秋風生留仙  
意孔亟皇孫被啄盡迷者猶不識自古女戎禍蔓延在頃刻

漢家家法傳清淨信爲德

聞回部張格爾就擒喜賦

飛驛紅旗達薊門歡聲喜氣動乾坤  
軍中曲唱婆陀力塞外生擒吐谷渾  
征討安邊功已歲撫綏善後策須論  
祇今來格旬剛七干羽先霑

帝陛恩

廟謨

廷算本精詳文武承宣我伐張上相  
勳高裴晉國元戎望重郭汾陽  
金天日月光新碣鐵勒山河復舊疆  
從此四溟鯨浪息不徒西徼樂耕桑

題何烈女傳後

女子甫字人義與已嫁殊獨守靡他志  
之死堅從夫夫死兒

不死苟活性所恥夫死兒遽死何以慰母氏母死兒仍生豈  
不辜前盟死乘母死後烈乃與孝并兒非欲立異但知行已  
意意愜目始瞑毀譽兩不計君不見娥江之水揚清波磨笄  
之山長峩峩閨房一節已千古誰其兼者何氏女

題徐筆珊明府瀛西征日記

縛袴居然出漢關書生膽氣未爲孱朝辭虎落中周地夜宿  
鴉飛不到山絕塞笳聲催遠夢炎天雪影照清顏應嗤入蜀  
行程記務觀遊蹤只等閒

宋胡忠簡公遺像硯歌并序

公以紹興八年抗疏拂姦相秦檜意貶廣州二十五年  
檜死量移衡州此硯係二十八年戊寅馬和之爲  
寫像明成化間儲瓘得之盛以匣而鐫題其上今歸



呂幼心司馬

宣靖玉硯塵沙蒙渡江廟畧惟和戎殿中鬚眉盡巾幗健者  
獨推忠簡公公昔齋戒坐小閣繕成奏疏振頽俗一身羞立  
小朝廷萬口爭誇大著作想其對此佳硯田吮筆濡墨無回  
旋同時馬公定親嗜銀毫寫照神能傳後來得者儲文懿明  
窗淨几高位置恍兮惚兮如見公標題欲灑千秋淚我聞南  
渡之初多名臣如公尤宜柱石珍爾時廟堂若大用硯池雲  
起龍可伸恢復仍都洛城裏御容圖繪震邊鄙胡爲畫地甘  
自困忠言轉如石激水公具天然堅白姿磨涅豈復愁磷淄  
但惜奇表不向鱗閣見卻于一方石上鐫霜髭吁嗟乎至寶  
流傳共珍異當日竟同瓦礫棄願君行篋勤護持長爲乾坤  
留正氣

題秀水陸烈婦傳後

烈婦何氏秀水庠生陸佳森妻道光辛卯三月桂森卒烈婦年二十

七以有遺腹子不列未半載遺腹子又殤乃於次日投纆而逝時十一月十八日也同邑金岱峯廣文衍

宗為作傳

女陽亭邊杵聲歇冤禽南飛夜嘯血生平弱質那禁愁肝膽  
蚤為稟砧裂天路獰颯苦常攪瓊樹一枝又吹折裊裊游絲  
空所依淚流到水水嗚咽晨猶上堂拜公姥面無覺容心永  
訣精剛繞指鬚眉羞高義而今見不櫛道光辛卯十一月十  
有八日天欲雪竹泣松號人語絕陰風慘澹砭肌骨素帷開  
處一縷香乃自梅花閣中出

於學舍鄰圃得孫吳天冊元年甄喜而有作

西鄰得寶歌聯翩吳赤烏與天冊甄我時雖好不敢奪褐父  
旁睨心茫然誰謂珍材自呈露近在牆東荒圃邊剗苔剔蘚

玉去垢乃亦天冊元年鑄篆文凡八七完好惟有末字形不全旁勒當時錢範二其文曰大泉當千此錢鑄自赤烏始嘉禾五百猶在前想從紫髯定制後歷三嗣主無變遷乙未改元降赦令與晉咸甯同布宣前年七月盛遣使科出亡叛勞輿篋因之域民恃地險修治不遺東海壖更閱五載遂歸命崇墉何足誇精堅劫灰屢壞此不壞迄今幾千六百年未知何時辱草莽棘鍼鍼四面相糾纏萬物沈埋有定數一朝遇合眞良緣衰齡獲此勝銀尺待成璋硯同磨研

錢警石得孫吳赤烏十二年甄及天冊元年甄各一有

詩屬和

仲文求古心忘劬秦碑漢牒羅清娛旁搜又得兩令辟陽文款識皆孫吳其一形長恰盈尺紀年十二鑄赤烏先時海鹽

奏龍見寶鼎新出臨平湖詔治城郭備盜賊英雄將已無周  
瑜赤壁功雖不再見金城千里堪無虞斑闌車耳勢尙赫不  
知何故臣當塗末孫彭祖未歸命新宮驅使千丁夫暴君縱  
欲殫民力攻築定知無地無穿土得銀刻年月乃以天冊誇  
祥符郡縣長官昧大體在所表瑞爭導諛臨平湖邊石函啟  
三郎怪說騰司巫天璽天紀元遞改浮雲變滅真須與由來  
立國貴強武奚取徽號頻頻殊陶人搏埴工未竟已看青蓋  
飛洛都四世相傳玉璽六一朝拋棄同砮砮擲輒續命歌慘  
澹樂府有鄰輒續命等曲當年瑞應空成圖劫灰吹盡百不有惟留雙  
璧供座隅君詩論古具特識流傳當與斯輒俱何時掌紋滿  
一并贈余作研豪常濡括異志庚子歲湖間得輒一片兩面皆有手掌紋不知此輒始於何時或  
取以爲硯清潤細膩可愛

蔣

灃字秋舫平湖人嘉慶戊辰順天舉人官湖北通城知縣著秋舫詩鈔

召試

縣志嘉慶戊辰灃恭應天津取列二等是年順天鄉試中式官湖北知縣勤於莅事

罷官後僑寓楚中課徒自給

海昌安澗園

淺綠垣牆繡古苔名園攜客共裴回  
風花半落鳥銜去水浪欲圓魚攪開  
衛國平泉餘草木謝公別墅尙樓臺  
溪邊綠盡垂楊柳重擬提壺得得來

襄城道中

征馬長嘶趁晚程潁濱西去古襄城  
路從深樹灣頭轉人在亂山缺處行  
白草高原歸鳥影綠波新水落帆聲  
詩豪可有劉賓客望望嵩樓繫我情

陳

鶴字聲叔海鹽人嘉慶戊辰副貢官昌化教諭著碧琅館詩草

縣志鶴勤于課  
士造就甚廣

### 柯亭

老竹臥屋梁夜作蛟龍嘯不遇漢中郎清音沈越嶠神物與  
奇士精靈默感召君看焦桐枝鮫絃發古調空山多良材蕪  
沒誰燭照斯人逐雲去夜月子規弔荒亭認殘迹寒泉咽萬  
竅水面笛飛來斜陽下古廟

### 畫松歌爲李此山布衣

端本作

空堂蜿蜒走蛟龍耳後謾謾聞悲風摩挲醉眼豁陰霧驚看  
李生之畫松李生雪髯垂一尺吟詩自慙釣鼈客作書能進  
換鵝格大瓢酣飲儕入仙肺腑槎枒出酒魄蒼鬣天矯鱗之  
而直榦不作輪囷姿干霄蔽日骨氣挺雄奇想見胸中正直  
無邪思空山岑寂飢狂嘑林巒幽晦煙霾迷落落漠漠傲霜

雪不與紅紫競妍媸陡見嶙峋怪石爭扶持亦如李生支離  
 偃蹇人不知李生李生真吾儔暑無蚊疇冬無裘手攜枯藤  
 尋酒樓家乏擔石儲羞為稻梁謀畫中老松呼作歲寒友梅  
 花修竹同清幽一朝坦然隨物化天陰雨黑聞鳩鵲嗚呼精  
 英入地難汨沒讀我李生畫生氣長鬱勃招得千年老鶴魂  
 懸之萬古青霄月

陸費瓌

原名恩洪字玉泉號春帆桐鄉人嘉慶戊辰  
 副貢官至湖南巡撫祀名宦著真息齋詩鈔

府志瓌以湖北麻城知縣難歸服闋揀發直隸補棗強  
 升易州牧擢正定守調保定以幹練稱擢臬司升廣西  
 藩司調直隸道光庚子振濟天津水災活民數十萬民  
 追感元鎮舊德遂播大小清天之頌尋擢湖南巡撫多  
 政績憂歸

未幾卒

縣志瓌力學敦行負經世略所至有惠政尤以善決獄  
 聞任直隸藩司時林文忠公奏請於直隸開墾水田公  
 往天津查勘令民認墾納糧永為民業百姓至今蒙利  
 撫湘七年適值轄境蠢動留意武備大操外別設小操

日親校之部署行陳一如戚繼先練兵遺法光後斬賊  
亂民及苗獠之從賊者數千人銜桂鳳永乃大定咸豐  
同治以來東南勦賊之功湘軍為多宿  
將如黃翼升李朝斌皆公之舊部曲也  
冷廬雜議春帆中丞自幼即耽吟咏在長沙節署時築  
校經堂課士以湘江竹枝詞命題自賦十二絕極極遊  
之致

### 湘江竹枝詞

斑竹涓涓淚尚零望湘亭上弔湘靈孤篷聽雨巴陵岸一夜  
愁心滿洞庭

三十六灣蘆荻秋飛花如雪撲即舟請看今夜灣灣月雙宿  
鴛鴦已白頭

### 官倉粟

官倉有粟鼠飛不伏一鼠張牙羣鼠鼓腹粟積纍纍鼠行若  
虺百鼠一狸實惟厥魁粟在倉不易出粟在田不易入田一



莖倉一粒簸之揚之百而什野有烏尾畢逋嘵飢啞啞八九  
雛田中粟倉中土飢不敢哺畏鼠如虎雛死烏嘵鼠其怒嗟  
嗟羣鳥不如鼠

### 雀飛多

雀飛多苦無食禾黍在田雀鼓翼羣雀螻螻一雀獨豪爲我  
謂羣雀爾鳴聲弗高分其餘食哺爾曹雀飽不得飛羣雀猶  
嘵飢羣雀不飢伺爾肥網羅在山巔一雀投其閒羣雀飛飛  
猶在田

### 項朝棻

字聚芬號蓮峯仁和  
歲貢箸琴臺小稿

吳振械傳略蓮峯少工詩與黃相圃吳穀人姚春漪相  
角逐同爲新年雜詠頗稱于時能懸臂作小楷運筆如  
飛手鈔所讀書  
終卷無訛脫者

冬至日雨過古歡堂

經冬雨不休陰晦積山谷茲辰轉微陽雨意猶未足高館靜  
且閒衝泥來不速晚色漸凝寒清言屢更僕丈人詩格嚴不  
解悅眾目新排吟卷成淨若冰與玉平時有高會喜我差不  
俗能來其賦詩相對半尊宿晴暄看早梅明月醉春醪卽今  
苦霑溼猶可慰幽獨促席話深宵步檐聽短瀑遙知雪意深  
已有風驚竹

黃延禔

字平甫錢塘人官江蘇泰州吏目

羣雅二集君才識宏通自參百宮保幕府詩得朱清湖之傳五字兼有晉唐風味

述懷十首 錄二

羅浮海中雪有約游未果復爲梅花行餽糧卽辰裹才疎媿  
遠招旅宦意詎左節樓遞鈴語薇垣散香朵方以歷覽心值  
茲風景可挽手問煙霞山靈應識我

井疆如錯繡扶犁始催耕春華濯新柳旌旗東郊行餘寒養  
麥氣翠浮千隴平炊煙澹林木比閭聞雞聲先疇志勤勉老  
幼無佗營桔槔且休息喜雨偕民情

汪

琳字蓮浦號松  
風錢塘人

次韻馬謙香曉登瑞石峰寫望之作

貽我谿笏篇把之頌三帀知君意興豪崕嶸恣騰踏徑造瑞  
峰巔擬欲排闥闔是時天風生山鳴谷聲答海日升初紅照  
耀彌六合城闔多勞人漸次車馬雜自覺置身高披襟受爽  
颯靜妙悟禪機何必參山衲舉手招白雲定有皈依鶴

題女史沈湘佩梅竹畫

女史名寶  
善杭州人

仲圭粉本東坡筆妙手空靈兩得之想像孤山晴雪後徘徊  
淇澳月明時羅浮夢遠人千里湘水情深酒一卮自是此君

饒逸致巡檐索笑故遲遲

沈學善

字遵生錢塘人

杭郡詩三輯遵生長身玉立吐氣如虹善鼓琴承其父竹亭明經書學出佐記室性極冷雋

題宋小茗丈

咸熙詩稿

竭來鼓柁秀州行省識先生不世情  
拄腹書誇秦博士降心從有魯諸生  
集因官冷成編易人爲才多到處迎  
我愧門牆空仰止羨他桃李向春榮

卜爾昌

字蕪門錢塘人著蕪門遺稿

魏謙升傳畧蕪門重然諾篤友誼其館于余兄也以老母在堂暮必籠鏡以歸工詩精八法所爲詩十冊皆作

細書良可寶貴

方坦序畧蕪門性冲夷不苟言笑下筆能自出機杼無前人窠臼語惜天不假年未能盡其才也同里魏月隲

兆奎刊其遺詩

沈學善 卜爾昌

奎

名川上

錢武肅王甄硯歌為六舟上人作

上人工詩畫精篆籀性尤好金石嘗得甄

硯一百八方皆前代物今新獲一甄背有梵字并鐫  
參正四年七月錢氏作知為武肅遺篋拓贈徵詩

六舟上人雅無敵好古工詩久成癖收來前代百八甄於今

又得錢王雙篋長盈尺厚踰寸迴文斑駁土花褪大書寶正

紀以年屈曲字字相鉤連駟馬功勳付塼埴香姜銅雀如雲

煙君不見六和井照見龍宮頑鐵冷又不見水月幢鉅石兀

立開僧窗梁甌擊破趙璧缺唯有此甄不磨滅磨甄作鏡鏡

作甄冕旒影裏光瑩澈上人前身古貫休獻詩合與錢王遊

琢成良研工雕鏤綠蕉揮寫皆龍蚪此甄聲價同千秋

野店

一抹斜陽上酒旗炊煙縷縷出疏籬客稀蓬戶闌常早路僻

行人到恐遲著意當壚非絕色舉頭滿壁有殘詩寒雞那管

鄉心切唱徹山街月落時

與平山蓮府游西馬塍紅柏山莊

輞川別墅隱林邱野篠陰陰翠欲浮四面雲山留畫本一灣  
溪水抱清流秋花市地開如繡古蘚緣牆綠上樓昔日亭臺  
今斷瓦滄桑彈指使人愁

金

榮字丹采號素中仁和人官山東濟南知府箸清暉閣集

楊振鏞曰素中原籍休甯詩見王柳村羣雅集

重陽日過仙霞嶺

五年三度嶺此度恰重陽正好登高會誰憐在異鄉遙天賓  
雁入細雨客衣涼憶昨中秋節團樂侍北堂

張在茲

字雨湖仁和人

謁明金僉事

應奎墓

故家喬木半荒蕪留與鬚眉入畫圖肯以名牋緣奧地不妨赤棒辱闍奴調高吟社思成未政箸河渠書上無端賴後人

搜譜牒前朝正氣重西湖

姜

同

字夢薌仁和人候選同知箸紅杏山房詩鈔銷夏倡酬集

丁丙曰夢薌熟于南宋掌故其臨安懷古詩尤為一時傳誦

奉招諸公小集養拙山房

六月天氣涼兼旬梅雨足古砌繡苔痕狹巷轉車轂相期高軒來足音響空谷凌晨啟蓬門倒屣迎高躅長者不遐棄入門路迂曲女蘿圍野霽高柳颺修纛鸞尾影脩脩低映三閨屋未足娛嘉賓聊可避暑溽墟圻蟻初浮鼎沸茶正熟庖人不給鮮蔬筍聊當肉薄酒可頰顏癡糲難飽腹放箸愧盤空探瓶夜堪卜急雨忽翻盆簷溜如飛瀑涼意已先秋林閒風

謾謾憶昔廿年前羣賢半雌伏張燈夜開讌一月計五六時

生梅史琴塢青士諸先生與家大父時集草堂險韻鬪尖叉醉眼亂紅綠我時尙襁

褌不辨麥與菽偶然隔離窺遊客如奔鹿轉瞬歎晨星謂曼

已歸道山飄忽若轉燭斯集半昔游謂小湖夫子積堂先生行輩我伯叔賤

子愧散材那堪相似續幸藉諸君名前會行可復

杭端仁字慕庭仁和人

杭郡詩三輯慕庭爲堇浦太史後人精岐雷之術嘗游嶺南

訪王見大於環翠閣賦贈

蒼崖峭壁迴難儔避地高居百尺樓人道嗣宗能白眼我逢

東野欲低頭寶山許入慙空返珠海論交仗冥收瀟灑林塘

賢地主不辭衝雨豁羈愁

周思兼字梅坪海甯諸生著夢梨雲仙館詩集



應時良序畧君詩兼學唐宋秀骨天成語往往奪山緣  
少作工琢鍊清麗為鄰中年後格老氣蒼體勢尤近古  
殆意恹關飛動

朱有萊序畧君蚤歲能文詩名尤噪弱冠為諸生食廩  
錄有聲庠序間顧久躋場屋所作窮而益工辛巳余讀  
禮閒居復與君續倡酬之雅君詩律益細今春余將入  
都君來話別酒酣輒感唏噓自傷遲暮余方慰君別

未幾即聞惡耗爰句君總角交  
應君笠湖校定梨棗則余任之  
吳振域日梅坪為松靄大令從孫其時俞潛山吳兔牀  
亦以詞場老宿提倡風雅鍾善溪復起而羽翼之于是

梅坪及徐秋鶚瀆應笠湖時良潘  
香士文輅皆以詩爭鳴鬱為後起  
許注詳日梅坪先生與先府君交最善集中多倡和之  
作曾為府君題聽秋圖自經兵燹圖已遺佚而詩存集  
中倦裏手澤不

蜀鏡詞和受笙  
鏡徑三寸六分重十兩有半背作寶柑  
花入盛捧雙魚海螺之屬銘曰鍊形神  
冶瑩質良工當眉寫翠對臉傳紅如珠出匣似月停

空綺窗繡幌俱涵影中凡三十二字按張君房麗情  
集載蜀後主衍幸鳳州天雄軍節度使王承休  
妻嚴氏有絕色衍愛幸之賜以妝鏡其銘云云

螺紋旋綠古銅蠹一片相思眞錯鑄綺窗繡幌影如煙玳匣  
芙蓉泣秋露三十二字傳麗情環以寶相花八盛新妝正對  
玉顏好一顧那知城已傾酒悲侍宴宣華夕不照嘉王心膽  
赤回鶻倉皇小隊歸貪狼颯忽降旛掣此鏡分明感逝波飄  
零舊夢蜀山河珠星黯黯沈僊掌寶月明明失素蛾已分塵  
封兼蘚蝕一朝重覩光明色回首淒涼三趙村金鐙玉梳無  
消息此日摩挲影倍寒同心人去物團團願將寫翠傳紅語  
留作千秋冰鑑看

弔孫太初先生墓

五嶽漂零迹半存天涯誰問舊王孫千年鶴去遺僊峴一片  
雲歸戀客魂古壁寒瓢何處訪歸雲庵有掛瓢堂額鄭少谷書先生舊物也夕陽  
斷碣忍重論高風若比孤山麓只少梅花繞墓門

觀潮行

海風撲鼻魚龍腥  
纖雲捲盡遙山青  
四顧海天秋一色  
蒼然未見濤之形  
須臾戰鼓轟雷烈  
練光一綫海門裂  
浪花蹴起銀山高  
浩浩長天曠晴雪  
壯哉天地湧奇觀  
千人萬人心骨寒  
前胥後種颯馳驟  
三軍鼓怒相觸搏  
銳頭突出黃牛壯  
銀髮白馬屹相向  
水不平流直上飛  
江亦作勢如相抗  
江水倒卷海水張  
潮頭一起千丈強  
水犀控弩不敢發  
電影劃破蛟螭光  
瓊岑玉穴當空立  
吳兒踏浪出復入  
妖蜃驅雲渤澥空  
大鯤擊水鴻濛溼  
星馳電激何其雄  
雙壘失勢凌波中  
回頭卻望潮生處  
滄溟萬里煙濛濛

夜雨懷笠湖吳江

支枕何憐然  
檐風動疏竹  
寒雨滴殘更  
隔牖聲斷續  
此夕遠

思君夢繞寒江曲，杳度煙鐘蕭蕭鳴。水榭一舸遲宵程，篷底鐙如粟。詰朝快新晴，飽看吳山綠。

朱少僊夫子重修尊經閣落成紀事

三層傑閣何峻嶒，喬基雄峙東海濱。榮光萬丈燭霄漢，煥以

寶額，顏尊經。嘉靖十年閣始建，與啟聖祠輝膠鬻。明嘉靖十

公堯時建閣，州志失載。重檐複戶環窈窕，插天雲構飛丹甍。南面大海

景奇絕，諸山拱立如瑤星。北面城市接村郭，指顧百里生煙

雲。中有琉璃三萬軸，奇祕直與嫺嬛鄰。笙典珠墳富枕葑，金

題玉躐紛披，陳所嗟。棟宇日就圯，紅羊閱劫時代更。聿稽萬

厯，曾修治。厥後亦見丹雘新。明萬厯二十七年通判張公汝

允重然而峻閣難久峙，年深風雨頽軒楹。叢殘古簡走脈望，

荒涼壞壁穿鼯鼯。千秋俎豆皮塵垢，彝鼎瘦蝕銅花青。舊有祭器

向藏閣中

先生系出紫陽後雄才卓犖追前型場來吾邑開講席

春風桃李羅芳馨重新椽桷首倡議亭曰敬一堂明倫更捐

鶴俸繕齋署一一慘澹勞經營忍令此閣就剝落捐金重葺

眾力并歲在柔兆攝提格春暈功築夏落成棖題并幹絢金

碧依然飛宇撐嶙峋晴霞一抹烘翠瓦天風四面敲檐鈴巍

巍聖貌肅瞻拜冕旒端坐最上層其中移祀昌黎伯英姿颯

爽來神靈

時土地祠就祀韓文公像亦遷閣上

文瀾灝瀚傾三峽海潮倒走不

敢爭先生功烈洵不朽張郭肖像難抗衡

閣下向有張公汝賢郭公一輪像

惜哉卷帙半錯謬縱橫蝨簡堆書棚我時奉命重手檢余及

香上整理閣上書籍

搜羅殘缺扶敲傾如得千狐集其腋如治亂絲理

其勢縹緗插架復完好部分甲乙籤丙丁從茲儒風亦丕振

就鈔懷餅談觥觥洛水青魚挾淵奧端門赤鳥窺精英我欲

觀書并觀海攜朋同作青雲登

碌碌

碌碌不可已今朝且放慵詩愁和病減睡味得春濃鶯語試  
三兩簾衣開幾重起探梅信息一笑隔煙逢

題許嘯園

樟

桐陰避暑圖

雙樹交杈枒圭影一坳裏綃衣著涼翠下有幽人坐石矮皮  
玲瓏落輦席帖妥寒凝湘水弦綠割岫雲朵肯容畏景侵但  
覺秋心惹不知塵壚外杲杲繖撐火窈冷眠風佳詩瘦題葉  
可何當觸熱來一枝許借我

題許珊林聽秋圖

星河壓檐颭風影孤笛不吹夜初靜幽人趺坐秋心閒寒籟  
忽觸長林閒露珠無聲滴煙綠悄俟明蟾一鉤曲

過陳簡莊果園有感

徵君讀書處夙昔未經過今日一來訪雲山感慨多遺編度  
几格壤壁冒煙蘿何限黃墟思臨風發浩歌

題顧亭林先生小像

地老天荒歲月深奇才如此竟山林傳經獨下千秋淚歷劫  
難灰百感心滾滾窮塵聊託足茫茫異代少知音管甯高節  
萇宏血都向遺民傳裏尋

碧浪湖送春

短篷曾記泊前汀一抹煙痕柳未青底事春光如夢短重來  
飛絮作浮萍

載酒江湖悵舊游華年如水付東流尋春莫怪樊川老說著  
濃陰我亦愁

蔣

楷字夢花海甯人

郭慶曰夢花收藏極富鑿別亦精有讀畫吟評皆與到點筆之作唐六如林園曉起圖一詩尤工  
緝雅堂詩話白石說詩不多而神理相毋如云說景要  
微妙五字耐看至嶽寒知松柏難處見作者直是論人  
非僅為詩發也夢花詩頗有才思說景之作尚須商量

初夏陳簡莊 招集同人分韻得瀉字

達人淡榮利棲志在山野小築傍巖阿芳鄰結蘭若蘿徑碧  
煙浮花湖紅泉瀉竹生動石根果落響檐瓦林壑供釣游煙  
霞恣陶冶晏坐一孤亭曠懷萬廣廈風雨集苔岑意氣鄙裘  
馬人閒高論多境靜塵事寡玉壺行買春水閣訂消夏既醉  
詠而歸有客亦風雅

胡

玉字蘭枝號西鄰嘉

程世欽序略西鄰嗜詩所交皆騷人韻士討論古今  
媿不倦性冲淡不樂仕進為人軒昂磊落尙意氣重然



諾詩其  
餘事也

秋日登金山

片帆風翦興堪乘  
攜手登臨到上層  
萬頃銀濤圍玉帶  
千尋雪練走金陵  
雲開吳楚秋無際  
雨過江天月乍升  
坡老風流渺難接  
聊將往事問山僧

簡程瑤溪兼訂鄧尉探梅

臘雪未盡消  
鳥嘯隄邊柳  
梅花雪不如  
香到掌中酒  
擎杯思遠道  
惻惻屢回首  
故人住江南  
鄧尉梅開久  
昨夜清夢中  
暗香落我手  
與君別已遙  
離情劇難剖  
何日虎山橋  
吹笛招良友

王啟曾

字寶所嘉興人  
著南田詩草

石湖

石湖名最久曾此閱圖經乘興尋遺迹當秋訪廢亭水環三

面碧山擁一邊青舊隱人何處無由薦白萍范石湖居士隱此

### 虎邱白公祠

青青楊柳江南春風起楊花愁殺人公有憶江南柳詩我來隄畔尋

遺迹但見祠堂結構新人言此中祠白傅旁列大蘇及老杜

三公洵是文中豪餘子卑卑不足數昔公遷謫居江州俄從

武林來武邱武邱花月年年好詩筒酒盞無時休碧玉一彎

水如帶青山幾疊朝凝黛女墳湖北武邱西定有當時吟魄

在莫忘使君吟詠處女墳湖北武邱西公武邱寺留別句文讌流連歡未足會昌花落

人去速瀟瀟暮雨近荒邱不堪重聽吳娘曲

### 汪繼熊字芝亭嘉善人

府志繼熊年弱冠學詩于黃退庵多識江浙知名士凡過魏塘者繼熊必為申款治馬

泊舟普陀庵用東坡夜泊牛口韻

夕陽欲下山暝煙生渚口移舟向茆庵繫纜水楊柳溪翁罷  
釣歸魚鰕上市售於焉治晚餐篙師急沽酒小飲坐篷窗對  
月傾一斗翦燭更深談不覺漏沈久自笑來胡為特為山靈  
誘入山待婚嫁毋乃太株守清遊已大佳况復偕詩友謂子未  
頻年杜門居俯仰一室陋明隨猿鶴羣笑謝牛馬走

馬詒孫

字穀士海鹽諸生箸鶴時小稿

袁渭鍾序略穀士幼承家學耽于吟咏所作短章皆清新可誦

武林客夜

濤聲挾風聲洶湧難區別居人如不聞病客心悒悒是時夜  
正午布衾冷似鐵敲枕悄無寐觸目轉清絕簾前殘月光疑  
是一庭雪披衣起危坐蟋蟀聲鳴咽

林壽椿

字雪巖平湖槩生  
箸鞠泉山館吟稿

盛坳跋略先生為徐雪廬先生高弟不慕榮  
利澹於進取好為詩遊迹所經輒以詩紀之

武林道中

落日武林道橫塘一櫂斜竹閒通酒市沙上聚漁家舊壘埋  
荒草秋城起暮笳湖山容結屋水木攬清華

歸谿散步

身逐孤雲一味閒芒屨徐步碧谿灣風鳴殘葉疑秋雨煙擁  
平林似遠山江上檣颿歸荻浦邨中雞犬傍柴關行吟不覺  
斜陽墮極目長空片鳥還

錢仁榮

字雨香平湖增生  
箸倩霞軒詩藁

許仁杰曰君博聞洽見延攬名流阮相  
國輯兩浙輶軒錄禾郡文獻采訪甚多

陳山寺

古寺陳山麓探幽日抱琴亂峰空翠合一徑白雲深入座耽  
僧話繙經見道心歸來天欲暝倦鳥各投林

董慶槐

字春尊號音樹鳥程諸  
生著種菘山房詩草吟

落葉

霜花染秋樹丹黃正交錯俄聞策策聲風葉滿庭落杈極賸  
枯枝三徑氣蕭索譬如深宮女君恩日以薄又如翻覆交意  
氣漸落寞默傷秋士懷命酒聊獨酌

春來紅紫花入夏變濃綠濃綠能幾時零落委空谷人情惜  
目前動謂生理蹙豈知霜雪中萌芽已潛伏不見桃李枝細  
蕊離離簇

舟過寒山

拔地孤峯出青蒼俯碧流幾家還聚市獨客偶停舟飛塔干

尋迴叢蘆兩岸秋西風蘋末起遠近采菱謳

沈採晉 字錫田歸安諸生

仙子送劉阮出洞

碧雲無際是天台流水何曾去復來久住不知塵世隔瀕行  
始惜洞門開香分芍藥腸應斷綠到麝蕪首重回從此沃州  
山下路更無人迹長莓苔

仙子洞中有懷劉阮

嬾奏瓊簫整羽裳離愁更比世閒長朱闌十二春岑寂碧宇  
三千路杳茫瑤草有情空自綠桃花無語為誰香遙知下界  
還相憶幾度樽前喚索郎

徐傳經 字仲魚德清人官國子監典簿著壽穀堂詩集

柳隱叢談仲魚僑居禾中金陀坊少年好學書宗顏魯公畫似白陽山人詩不多作奇逸有致

夜泊東衡里納涼

夜熱不成寐起來酒半醒蛙聲如驟雨螢火亂飛星人對青

山坐舟依綠樹停納涼篷背好風水自泠泠

陳夢蘭

字展青號秋皋慈谿歲貢著平鳴集

尹元焯曰秋皋詩不矜才使氣深醇婉擊風藻翩翩王亞伶極稱之

久雨次族叔臥雲韻

到蘇已而月春暮尙驚寒吳越天疑漏關山雪未殘吳門清

兩雪酒腸餘塊壘花事惜闌珊莫問園中景愁人怕倚闌

葉

焯字允光號意亭慈谿人官刑部主事著鶴麓山房詩稿六卷

和黃煊雲湖看梅

雲湖梅萬樹十里隔塵寰清影長留月高人合住山吟來香

有韻春到客難閒為訂明朝約同尋水竹閒

陸文傑

字敏齋山陰人官江蘇崑山縣丞著松月山莊詩鈔

朱綬序略敏齋少隨宦蜀中攬錦江劍閣之勝發而為詩既官江南不廢吟嘯賢勞行役有北山詩人之思

漳臺銅鴨歌

有序

乾隆初外大父鶴泉丁公入都經漳河見土人濬河得銅鴨一古色斑爛冶工精絕腹有二印一曰孟德一曰銅雀東閣知為曹家舊物遂市以歸公歿後歸余恐久而弗彰也歌以紀之

丁鶴泉公多逸致生平奇癖愛古器魚甌雞匱羅滿堂就中寶鴨尤得意自昔驅馬臨清漳土人舉鋪生寒苦離奇篆印蘇未蝕將歸溫以龍涎香周鼎商彝同不朽二千年物真罕有置之視北琴南閒鎮日摩挲不離手詒我為我開雙瞳陸離斑駁光熊熊阿瞞當年鑄此鴨良冶應與銅雀同轉瞬西



陵一抔土賣履分香亦何補吁嗟爾亦一世雄不如此鴨尚  
千古君不見銅雀臺傾瓦一片後人好事磨爲硯區區陶旅  
猶足珍況乃精金經百鍊

### 眉州謁蘇祠

古寺眉山下行人拜夕陽千秋名父子一代大文章蠶市家

猶近蓮池水自香玻璃春

眉州酒名

正美三酌有何妨

勺園

一名風塵里爲米萬鍾別業都人稱曰米家園萬鍾繪園中景爲燈人又稱米家燈

風煙寫入剡溪藤花石亭臺樹幾層絕勝元章書畫舫米家  
園繪米家燈

### 青羊宮

古剎何年建尋幽偶一過斷垣苔沒礎荒徑樹纏蘿蜀肆青  
羊渺函關紫氣多文端遺玩在無病亦摩挲

內有銅羊光澤可愛有疾者摩

之輒愈相傳遂甯  
張文端公所施

余國琛宇杏林山陰人

六紅詩話杏林世家子不慕榮利淡泊如寒素  
性穎異韻學算學並心究其微詩其餘事耳

秋蚊

附熱爾何恣經秋余轉憐飛愁風力緊鑽訝袷衣堅任汝傳  
雙翼多應飽老拳吮膏猶未厭有瞻大於天

張炯字莘田餘姚諸生著

呂賢基序略公幼失怙家貧奮志讀書幕遊衡湘積詩  
盈篋文孫文翰辛亥浙闈出余門因得讀公詩溫厚和  
平藹然忠厚之遺

九曲山館與宗芥颿先生話舊

憶昔垂髫時應試寓西郭窮鳥盡投林一枝欣有託公從都  
中來孝廉船甫泊吾師有舊交呼我隨苦屨登門謁先生行

李猶落落燕雲鬢髮留趙酒衣痕著持面互相看一笑善戲  
 謔呼僮羅酒饌肴核半藜藿為言行旅難不如家庭樂從此  
 一為別雲泥自各各出宰五羊城百粵頌聲作但迎生佛來  
 不愁狻性惡忽忽二十年宦海抽行腳朝為梧岡鳳暮為竹  
 林鶴今年忽相逢談笑復如昨并無石載舟惟有詩盈橐逸  
 民益淡泊伏波終矍鑠干將不殺人光芒猶躍躍

遊新湖畧

湖上尋芳此泊舟邈迤十里總清幽谿流曲屈盤仙島山色  
 陰濃結翠樓地闊天空人自隘鳶飛魚躍我何求回船載得  
 新詩料欲賦東坡赤壁遊

張

張 字夢九黃巖人著  
河干小隱遺草

墨林今話夢九性淡泊以書畫自娛所居枕山樓當方  
 山北麓紙窗竹榻琴書整潔翛然塵埃之外工畫山水

在虞山包山之  
間花亦佳

江城晚眺

一雨碧天秋蒼波激亂流鴉翻烏柏樹漁唱白蘋洲落日低  
城角寒潮上石頭飄零江上客憑眺不勝愁

李八邨莊

野客愛林泉幽棲拓數椽山雲宿簷下蘿月落罇前引水通  
茶竈隨風放釣船何當結鄰比相與樂忘年

方國泰

字文二號警齋金華人  
籍我樓詩稿我樓樂府

舊雨錄警齋詩宗漢魏兼工樂府好聚書乾隆中燬於  
火復棄產購之今我樓藏書尚贏萬卷又好結客不解  
治家人生產中年以後全  
盡交疏饘粥不給晏如也  
鄧鍾玉曰警齋先生性好客轟雷豪飲酒罷賦詩  
詩罷復飲歌呼嗚嗚不復知有人聞世亦奇士也  
有小偷入室括所有以去賦此寄慨

誰言方子貧方子富無匹一字值千金一卷千萬鎰讀書數  
 十年計數莫能悉慢藏竟誨盜防護或未密殘燈風雨餘  
 斲枕亂帙何來梁上君公然穴蓬華匪求迂倪畫不爲司  
 空筆囊括清暑裘席捲禦冬葛原褐與顏瓢蒐羅略已竭睡  
 魔方驚醒鼠輩早奔逸我聞古有盜夜入寒儒室亦旣拜  
 高風驚歎還所竊今乃捆載去賸餘十無一盜亦不如古  
 擁被三歎息

李士詔

字金門樂清諸生

東甌軼事隨筆金門先生博通經史兼工詩賦嘉道間郡中多詩壇吟社之會而先生豪情逸韻推爲社中祭酒以諸生終

朱壽保曰金門僑居郡城爲名花十友之一

秋蝶

回首東風事已非晚涼庭院尙依依莊生殘夢迷秋苑帝子  
春情賸舞衣疎雨蓮房愁獨宿夕陽菊圃見雙飛鶯鶯燕燕  
都腸斷問爾飄零何處歸

又逐西風過野橋尋香心事未全消酣紅豔紫荒三徑衰草  
寒煙鎖六朝空送烏衣辭舊壘更無團扇撲輕綃蘆花不比  
楊花性漫學顛狂逞舞腰

龍鼻洞

神龍行雨歸蜿蜒古洞裏鱗甲猶之而倒吸石中髓石髓甘  
且清涓涓流不已通塞分陰陽冬夏占泰否石盂仰以承相  
去不盈咫尺哉造物奇信矣山靈詭洞門豁然開游人停屐  
齒捫之殊有稜衙衙欲掉尾相顧駭然驚將毋葉公似只恐  
風雨晨峽破飛龍起

吳祖棠字子芾雲和人

宿雲壇

醉後臥山家更深客夢賒  
隣渠一夜雨滿地落桐花

兩浙輜軒續錄卷二十五